

**NATIONAL ASSEMBLY OF  
SEYCHELLES**

*Friday 17<sup>th</sup> March, 2023*

*The Assembly met at 0910am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou zofisye Lasanble e tou manm piblik ki pe akonpany nou ozordi. Byenveni pou nou travay Vandredi le 17 Mars.

Lo nou *Order Paper* ozordi i annan prensipalman kontinyasyon avek *reply SONA*. Mon annan en *Right of Reply* ki mon a partaz avek Lasanble la, sa i sorti kot Minister Ledikasyon dan non *PS Merna Eulentin*.

Onorab Pillay ou'n lev ou lanmen ou annan en *point of order*?

**HON SEBASTIEN PILLAY**

Wi, Mr Speaker mon annan en *point of order* lo sa ki ou fek dir.

**MR SPEAKER**

Wi.

**HON SEBASTIEN PILLAY**

Ki ou annan en *Right of Reply* dan non *PS Merna Eulentin*.

**MR SPEAKER**

Wi.

**HON SEBASTIEN PILLAY**

Dokiman ki'n ganny sirkile avek Lasanble personn pa'n siny sa dokiman.

**MR SPEAKER**

Wi.

**HON SEBASTIEN PILLAY**

So, ki mannyer nou Lasanble nou'n ganny en dokiman ki personn pa'n sinyen? Me ou, ou annan en dokiman ki'n ganny sinyen par *PS Merna Eulentin*?

**MR SPEAKER**

Wi.

**HON SEBASTIEN PILLAY**

Sa ki devan nou i paret mwan i annan en let anonim, akoz personn pa'n sinyen. E Lasanble pa sipoze pe *deal* avek en let anonim. Lo la sa dokiman ki mon annan la i en *statement* par Minister Ledikasyon. I pa en *Right of reply*.

**MR SPEAKER**

Mersi.

**HON SEBASTIEN PILLAY**

*This is not worth the paper it is written on, Mr Speaker!*

**MR SPEAKER**

Mersi.

**HON SEBASTIEN PILLAY**

*This is not a Right of Reply!*

**MR SPEAKER**

Mersi Onorab.

**HON SEBASTIEN PILLAY**

Nou pa *deal* avek let anonim dan Lasanble Nasyonal!

**MR SPEAKER**

Mersi bokou.

**HON SEBASTIEN PILLAY**

Si ti en *Right of Reply* nou ti ava ganny enn ki'n fini ekrir, Mr Speaker.

*(Interruption)*

**MR SPEAKER**

*Order!*

**HON SEBASTIEN PILLAY**

Nou ti ava ganny enn ki'n ganny ekrir.

*(Off-Mic)*

**HON SEBASTIEN PILLAY**

Egzakteman!

**MR SPEAKER**

*Order!*

**HON EBASTIEN PILLAY**

*This is not right, Mr Speaker! Zot, zot pe abiz nou privelez.*

**MR SPEAKER**

*Order* Onorab Pillay, mon'n ekout ou. *Order* prezan!

Mon'n enform, mon'n demann mon biro pou telefonn Minister Ledikasyon e pou dir zot i annan en *statement* dan zot non, e si sa i korek. E mon'n fer mon biro enform zot poudir en *statement* pa akseptab koman en *Right of Reply*. En *reply* i bezwen sorti kot en dimoun ki'n ganny *aggrieved*.

E zot in koriz sa e PS Merna Eulentin in fer en *reply* dan son non. *Yes*.

*(Interruption)*

**MR SPEAKER**

*Sa Right of.....*

**HON SEBASTIEN PILLAY**

*(Off-Mic)*

**MR SPEAKER**

*Yes?*

**HON SEBASTIEN PILLAY**

Mr Speaker, Lartik Konstitisyon i dir "ki ler ou resevwar sa *Right of Reply*, ou bezwen sirkil li

avek tou Manm Lasanble” ou pa’n sirkil sa ki ou pe lir ou!

**MR SPEAKER**

Yes.

**HON SEBASTIEN PILLAY**

Ou pa’n sirkil... Savedir ou pe vyol nou Konstitisyon bomaten. Sa *Right of Reply* pa kapab ganny lir dan Lasanble bomaten *until* ki i ganny sirkile avek tou Manm.

*Otherwise,* koman Prezidan, *Chairman SADC PF* ki sipoze *uphold democracy*, ou pe vyol nou demokrasi ozordi bomaten, Mr Speaker!

**MR SPEAKER**

Mersi. Mon pou lir sa *Right of Reply* e i a ganny sirkile avek Manm Lasanble. Sa *Right of Reply*.

*“Dear Mr Speaker, We write with reference to the speech by MNA Wilbert Herminie made this morning, in his reply to SONA 2023 in particular to the part of his speech stating that a group of qualified teachers will not be on the teachers list for 2024, therefore, not in employment. The Ministry denounces this statement categorical stating that no such announcement has been made at any time by any of its officers to any group of staff.*

*This sort of statement detracts on the hard work of the staff of the Ministry, in particular its teaching cadre and the HR staff of the Ministry who are trying their level best to move our system of education forward and to deliver quality education.”*

*The statement ends.*

Mon’n omit 2 paragaf ki napa naryen pou fer avek sa *issue* ki dan *Right of Reply*. Mersi.

Lo lezot kominikasyon, wi Onorab Pillay?

**HON SEBASTIEN PILLAY**

Mersi Mr Speaker. Mr Speaker, ou’n vyol nou privez koman Manm Lasanble ozordi bomaten dan sa Lasanble.

**MR SPEAKER**

Mersi Onorab.

**HON SEBASTIEN PILLAY**

E nou pa’n zanmen ganny sa *Right of Reply* devan nou. Sa ki ou’n fer ozordi bomaten, mon pe al imedyatman ekrir *SADC-PF*. Akoz sa i bann konportman ki montre poudir ou pa *fit to be the Chairman of SADC-PF* Mr Speaker!

**MR SPEAKER**

Mersi. Onorab Pillay, i kapab met nenport kominikasyon pou

nenport kel antite an ekrir e delivre. Onorab Herminie, nou pa pe antre dan deba lo *Right of Reply*. Si, wi. Si ou annan en konplent kont *Right of Reply*, silvouple ekrir mwan *state* ou obzeksyon e nou ava konsidere. Mersi.

*(Interruption)*

**MR SPEAKER**

Silvouple...

*(Interruption)*

**MR SPEAKER**

*Order! Order!* Onorab Pillay mon demann ou pou swiv lord Lasanble silvouple.

Bon. Lo lezot - lo lezot kominikasyon mon'n note ki i annan en Mosyon ki'n ganny *submit* koman en *emergency Motions*, en *urgent Motion* sorti kot *Leader* Lopoziyon e sa i an referans avek *Standing Order 137* lo laz pansyon.

Deputy Speaker in enform atraver Madanm Deputy Clerk, *Leader* Lopoziyon ki son Mosyon pou ganny plase lo *Order Paper* dan semenn le 28 ek le 29 e mon *concur* avek sa laranzman. Mersi.

Mon'n osi ganny enformen verbalman, par Madanm Deputy Clerk ki i annan en

*Urgent Question* sorti kot Onorab Gill. Me akoz en mank kominikasyon avek nou sistenm *email* mon pa'n ganny sa *Urgent Question* an ekrir. Alor mon pou *defer* konsiderasyon lo sa *Urgent Question*, e mon ava anons sa dan nou prosen sesyon Lasanble. E mon ava enform Onorab Gill osi vit ki mon ganny son *Urgent Question in writing*. Mersi.

Nou aprezan prosede avek nou *Order paper*. Onorab Pillay, wi ou *point of order*?

**HON SEBASTIEN PILLAY**

Mersi.

*(Off-Mic)*

**HON SEBASTIEN PILLAY**

Me mon pa pran lord ek ou mwan! Ou aranz ou, mon pa pran lord ek ou mwan!

**MR SPEAKER**

Onorab Pillay. Onorab Pillay.

*(Interruption)*

**HON SEBASTIEN PILLAY**

I annan zis en Mr Speaker la anler.

**MR SPEAKER**

Onorab Pillay, *state* ou *point of order* silvouple.

**HON SEBASTIEN PILLAY**

Mersi, mersi Mr Speaker. Mr Speaker, anba *Order 42*, ok. Mon'n *submit* mon Mosyon as an *Urgent Motion*, mwan mon konn mon *Standing Order* mon Onorab Naidu.

Mon'n *submit* mon Motion koman *Urgent Motion*. I annan dimoun ki pou ganny 63an la, i annan dimoun ki pe ganny 63an demen e zot pa pou gannyen zot sekirite sosyal, akoz sa *S.I* ki'n sorti. Ler nou ti diskite avek Gouvernman dan Lasanble, Gouvernman pa ti dir nou ki zot pou propoz lamannman dan laz sekirite sosyal.

Ti napa okenn bann *commitment firm* ki ti ganny fer avek Lasanble lo sa size. Set alor ki mon'n anvoy en *Urgent Motion* pou sa size. La ou dir mwan mon Mosyon san ki in ganny diskite avek mwan - san ki in ganny diskite avek mwan, san pou eksplik mwan si *whether* mon annan en *urgency*, i ganny mete le 28 ek le 29.

E sa ou apel i pe respekte nou drwa koman en Manm Lasanble. *At least* ti ava annan en diskisyon ki ti ava enform mwan pou dir, la, la desizyon ki zot pe pran.

Ni en *call*, ni en diskisyon pa ganny fer *and then* en desizyon i ganny kominike ek mwan bomaten. *But what is this?*

**MR SPEAKER**

Mersi Onorab Pillay.

**HON SEBASTIEN PILLAY**

Mon ti a kontan ou donn mwan en *ruling* lo la, ki mannyer nou pou *proceed*.

**MR SPEAKER**

Mersi, mon'n ekout ou *point of order*. Nou pou kontinyen avek prosedir parey in ganny anonse. Sa *Urgent Motion* pou vin lo *Order Paper* semenn le 28, le 29.

*(Interruption)*

*(US Members walk out of the Chamber.)*

***(APPLAUSE)***

**MR SPEAKER**

Bon, nou a kontinyen. Nou a kontinyen avek *Order Paper* avek repons lo Leta Lanasyon. E mon annan en *amended speech list*. Mon pou donn laparol Onorab Gervais Henrie pou son ladres.

**HON GERVAIS HENRIE**

Mersi Mr Speaker. Koleg *MNA*, zabitan distrik Mont Buxton e tou dimoun a lekout bonzour.

Ki kalite Sesel ou oule apartir ozordi? Ou ki annan 10an, dan 25an ki kalite Sesel ou pou oule ou zanfan i grandi ladan?

Ou ki annan 40an, dan 25an kalite Sesel ou pou oule ou pti zanfan pe grandi ladan?

Konpare avek sa ki pe arive dan lemonn antye e sirtou dan larezyon, nou pa vwar nou Nasyon pe met laliny pou ganny en pe karbiran. Nou napa mankman manze e okenn komodite esansyel. Nou Nasyon pe travay, pe ganny en saler. Marmay pe al lekol, sa ki malad pe ganny swen; Pe annan konstriksyon partou kote, biznes pe marse e lekonomi pe roule.

Mon rekonnet ki i annan bokou plis keksoz ki pe marse dan Sesel ozordi, konpare avek sa lo pa byen ditou e ki fodre nou adrese ozordi menm. Mon remerci Bondye ki malgre sa sityasyon ekonomik ki nou ti vin zwenn pei ladan an Oktob 2020, anba Gouvernman *LDS* sa pei pa'n koule e pa pou zanmen koule.

Mon santi ki atraver son diskour, Prezidan Ramkalawan in anvi nou reflexir ansanm lo ki kalite Sesel nou anvi. Atraver

nou aksyon ki direksyon ki nou oule nou pei i ale? Mazin 25an di-si. Eski nou isi anndan koman bann dirizan ki annan lipye dan kominote, e lot lo lasenn Nasyonal nou'n reflexir seryezman e ofer ase solisyon pou adres sa bann size swivan;

Kalite servis dan Sekter Piblik, ki mannyer nou develop en kiltir travay dir parmi nou popilasyon, lalit kont drog i enpir en nouvo zenerasyon dirizan Seselwa. Nou pou kapab konbat en ranvers sa bann defi enportan ki si nou retourn ver landrwa kot nou baze e re atas nou avek nou kominote.

E la Mr Speaker, mon pa pe koz zis pou nou bann dirizan, me pou tou Seselwa. Apre tou nou tou nou reste dan en kominote e nou tou nou annan en responsabilite pou fer epanouir nou vwazinaz.

Mon larepons lo mesaz Prezidan lo Leta Lanasyon pou met lanfaz lo nesesite partisipasyon sakenn de nou pou batir en Nasyon Seselwa, ki pare pou mazin son prosen. Touzour fer nou mye, pa zanmen bes lebra.

Respekte nou granmoun e elve byen nou zanfan. Konn nou drwa en responsabilite e travay avek lezot e an group. Partisipasyon sakenn de nou i bezwen komans avek

laspirasyon kot nou reste. Kwa e lekel ki egziste dan nou zalantour e ki mannyer nou protez nou kominote?

Osito posib ki nou fer sa refleksyon e aksepte ki nou form parti en kominote ki nou pa merit pe detas nou avek, nou a realize apre tou se nou kominote ki kontribye dan devlopman sosyal, politik, kiltirel e ekonomik Sesel.

Lo sa note mon oule anvoy en *shout out* pou pozitivite dan mon distrik. Sa i pou tou zanfan ki annan respe pou zot paran, ansenyan e tou sa ki pli gran ki zot. Sa latitud i ed ou fer byen lekol, zis parey Eli Leon e Hendrick Sophola, ki'n sorti koman meyer zelev lekol La Rosière dan Legzanmen Nasyonal lannen pase, avek 462 e 489 pwen respektivman.

Pou tou zenn ki pe tras zot lavenir e konnen kot zot anvi arive dan lavi parey Rasheed Mousmie ki propriyeter Raspay *Seychelles*. Pou tou fanmir ki ini avek kanmarad e touzour la pe siport enn a lot.

Pou tou anlwaye ki pe travay dir e konsyansyezman, akoz ou konn e konpran ou valer dan lasosyete. Pou tou anlwayer, biznes avek lenstitisyon ki apresye valer son anlwaye e ki pe ed pei devlope i vin pli ris.

Pou tou dimoun aze ki ankor pe montre bon legzanp lavi familyal parey Mr O'Brian e Mrs Mary-Anne Pierre ki sa lannen pe selebre zot 52<sup>enm</sup> laniverser maryaz. Konn dir bann artis *big up* zot tou. Annou fer en pe tapaz pou sa bann dimoun.

**(APPLAUSE)**

**HON GERVAIS HENRIE**

Zot zistwar i legzanp ki mannyer en dimoun i kapab sanz e enfliyans lezot. Apre tou lenspirasyon i kapab sorti nenport landrwa e propaz par nenport ki.

Mr Speaker, lo size Servis Piblik koman en pei avek nivo devlopman ki o, i akseptab pou sitwayen ekspekte en servis de kalite dan bann biro Gouvernman. Menm ler koman en pei nou'n akonplir bokou an term lenfrastriktir, parey lekol avek liniversite, klinik ek lopital, por ek erport, latelye ek faktori, nou'n tonm an aryer avek devlopman en kiltir rann kont e bann standar etik pou delivre meyer servis dan Gouvernman, dan benefis nou popilasyon.

Okenn *MNA* ki pran son rol reprezantan o serye, i pou remarke ki i bezwen souvan fer swivi lo bann ptipti keksoz ki

Prezidan in met lanfaz lo la. Par egzanp en *email*, en telefonn e en let ki pa'n reponn. Lapwentman ki'n tarde ouswa pa'n donn ditou e leksplikasyon ki pa'n donn byen, en *job interview* ouswa *tender* ki pa'n donn rezilta e desizyon ki tarde pran.

Wi, i annan defi, wi i annan dezapwentman avek Servis Piblik. E sa i pa nouvo. Diskour SONA Prezidan Michel an 2017 e pou Prezidan Faure an 2019 e 2020, ti demann Servis Piblik pou dres son bor. I pa drol ki dan milye son manda Prezidan Ramkalawan in swazir pou adres *servis delivery* dan Sekter Piblik.

I form parti sa transformasyon ki nou pei pe pas atraver apre ki pou premye fwa, depi son lendependans nou'n annan en sanzman ladministrasyon atraver bwat vote ki bann travayer Gouvernman pe bezwen adapte avek.

Si avan LDS ti vin o pouvwar ti annan en kiltir kot dimoun ki dan lotorite pa ti pe rann kont avek personn lo defayans dan antite ki zot ansarz, nou Gouvernman i anvi sanz sa ozordi.

LDS i determinen pou pa prolonz dezapwentman piblik lo nivo servis ki bann biro

Gouvernman i donnen ozordi menm. Nou krwar ki pa zis politisyen ki oblize rann kont, me okenn zofisye piblik e osi bann Lenstitisyon Paraetatik, biznes prive e lorganizasyon non-gouvernmental ki egziste par laverti larzan *tax* sa pep, pe merit rann nou kont.

Prezidan in adres sa problemm la, akoz dan son mesaz nou ekspekte li koz lo bann size enportan ki nou lapopilasyon pe fer fas avek ouswa ki i oule nou reflexir lo la. An retour dan nou larepons koman en Lasanble serye, nou sipoze donn bann lide pou rezourd sa bann defi par donn bann sizesyon enkli propozisyon pou nouvo Lalwa e polisi.

E zisteman Mr Speaker, la mwan pe propoze ki Gouvernman i revwar *Public Officers Ethics Act* en Lalwa ki date 15an pase. I osi annan *le fameux Public Service Order* ouswa *PSO*, ki'n ganny revize zis en fwa 13an pase depi son adopsyon an 1996.

Ansyen Sef Servis Piblik ti dir nou an Mars 2021, ki fodre sa dokiman i ganny transformen. Sorti en *Order* pou vin en Lalwa. Alor mon demande ki sa propozisyon i ganny etidye.



Atraver en prosesis Bidze tou-le-z-an nou siport Servis Piblik dan son modernizasyon, nou sipor i permet zot ganny lekipman modern, saler i garanti e menm ogmante. Batiman i renouvle, travayer i ganny loportinite formasyon, nouvo travayer i ganny rekrite e nouvo fasilite avek servis i ganny entrodwir.

Pour sa nou pe egzize ki en kiltir latransparans, enklisivite dan bann desizyon ki pou enpakte piblik e rann kont i osi ganny etabli dan Sekter Piblik. Sa i senpleman form par bann pratik e lareg sosyal administrative e politik e en monn modern.

Nou pou selebre reisit e lakonplisman nou Sekter Piblik enn fwa ki nou vwar konfyans sitwayen dan sa sekter i ogmante a en nivo respektab, e ki zot angaze libreman avek bann lenstitisyon.

Mon krwar ki tou sa ki swazir en karyer dan Servis Piblik, i merit pare pou fer sakrifis nesaser pou amelyor non selman nivo servis, me repitasyon sa antite ki nou travay ladan e mon krwar ki laplipar travayer i agrer avek sa. LDS i agrer avek sa.

Travayer Gouvernman i sorti dan en kominote e sa dimoun ki Prezidan i dir i fristre

i enn zot manm fanmir, zot vwazen, ansyen koleg lekol, al dan menm Legliz avek zot e vwayaz dan menm bis pou al travay ek ou anvil. I menm en lot travayer Servis Piblik, alor pou lanmour ou kominote kot ou sorti, silvouple re evalye ou responsabilite e ou performans ozordi menm.

Mr Speaker, Sesel i bezwen en nouvo kiltir kot travayer i konpran e aksepte son rol e responsabilite pou batir bann fanmir pli ere, kominote ki solid e en Nasyon prospere.

Gouvernman LDS pe ensiste lo 3 keksoz ki travayer pe merit fer;

- pran responsabilite,
- rode e ofer solisyon e
- fodre ou performen.

En dimoun dan en pozisyon travay i merit *the right person for the right job* parey nou dir an Angle.

Nou bezwen en lafors travayer ozordi ki annan en sel bi, annan lanmour pou nou louvraz parey nou kontan nou saler. Dan sa peryod transformasyon ki nou pei pe pas atraver nou bezwen atir bann meyer travayer dan tou sekter.

Dan 3an Mr Speaker nou pou selebre nou 50enm laniverser Lendependans.

Sertenman mon pa swete ki pou son mesaz lo Leta Lanasyon an 2027 (zot tann mwan, 2027) Prezidan Ramkalawan i vin koz lo linefikasite, mank disiplin e letarzi dan Sekter Lanplwa.

Solisyon i avek nou koman Seselwa, nou senpleman bezwen deside ki kalite Sesel nou anvi depi konmela menm.

Mr Speaker, sityasyon drog dan nou pei pe kout lavi, koman en Lasanble nou merit rezet polarizasyon sa size konmkwa tel parti politik pe detrir pei atraver drog ouswa ki tel parti pa patriyotik.

Koman bann reprezantan Lepep Seselwa nou bezwen bipartisan lo sa size e adres li avek en sel lavwa, akoz lavi nou pep ki an danze. Mon konversasyon avek en zofisye lapolis Mont Buxton lannen pase i ankor fre dan mon lespri. Ler i ti rakont mwan tou sa seye ki in seye avek son frer pou tir li dan drog, malerezman son lanmor avek en *overdose* Mont Fleuri ki ti termin son soufrans adiksyon lannen pase.

Drog pe detri bann fanmir, pe afekte lavi. Lanbisyon e karyer sitan endividi, i pe sanz nou sosyete dan en fason negativ e bokou fanmir pe soufer an silans akoz drog.

Mont Buxton nou annan problemn drog ki evidan partou. Pandan mon konpany pou ganny elekte an 2016, mon ti fer konesans avek en zenn. Ozordi i en *recovering addict* ki mon'n deza partaz son leksperyans isi pandan 6enm Lasanble.

Sa ki'n anmenn li kot i ete ozordi se en kantite lanmor, konprenezon e dimoun konpasyon. In fer en traze long e difisil apard son volonte, in annan dimoun ki'n debout a kote li, ki'n siport li e ki'n ankouraz li pou pa zanmen les tonbe.

Zistwar sa zenn garson Greenwich Mont Buxton i laprev gerizon e reabilitasyon i posib si nou travay ansanm e nou siport enn a lot. E se sa ki mon anvi koz lo la aprezan, pou ranforsi mon term lo lentervansyon ki langazman kominote.

I kler ki bokou dimoun sirtou sa ki zenn, pa konnen ki konsekans adiksyon pe anmennen e ki son konsekans pou vedir pou zot lavi personnel e pou sa ki otour zot. Demann laplipar dimoun ki dan eroin, akoz zot in komans pran sa drog zot tou zot napa en rezon konvenkan.

Dan sa moman tranzisyon ki nou pei pe pas atraver, letan

lo en kote bann Lotorite konsernen pe ranforsi batay kont sa ki finans trafik drog, sa ki fer vini, e sa ki vann, nou dan kominote nou bezwen komans en mouvman pou reabilit nou bann adikt.

Fodre ki nou ankouraz zot pou pa kanmi pou rakont zot zistwar. An retour zot leksperyans a kapab sov en lavi. Mon pe donn mon langazman Mont Buxton pou travay a kote sa ki enterese, e annan volante pou ed nou bann zenn ki'n deroute dan lavi.

I enportan ki nou bann ki en pe pli vye nou donn en lanmen pou lev zot kot zot in tonbe. Fodre nou pare pou montre sa zenerasyon ki pli zenn ki nou, ki nou pare pou siport zot, ki nou konsernen avek zot byennet e nou senpleman anvi vwar sa ki meyer pou zot.

Drog ozordi e depi yer in dan nou kominote, napa zot ek nou. Sa i realite nou kominote, nou lekol, nou vwazinaz e i kapab nou zanfan. Mon lapel pou bann zabitan Mont Buxton i senp, drog i en fleo. Parey ler en dife i pran ou anvi ki servis tenny dife ek sovtaz lo por Victoria i ariv se ou o pli vit posibil, pangar dife i sape. E propaz se ou lo ou propriyete.

Drog i parey. Ler ou vwar zanfan ou vwazen dam drog, pa vir laba e dir sa pa ou zanfan. I pa ou konsern. To ou tar avek plis zenn ki pe tonm dan drog ler ou fer levanter, drog pou'n ariv devan ou laport.

Alor se pour sa rezon nou bezwen siport sak zenn dan nou kominote e asire ki nou vwazinaz i merit met sa sityasyon anba kontrol, akoz drog pou detri Sesel si nou pa azir konmela menm.

An plis mon anvi fer en lapel, tre for e pasyonnen avek tou zanfan; pa zis Mont Buxton me atraver Sesel an antye. Silvouple pa fer sa fot pou al dan sa semen pran drog. I annan ase legzanp otour ou ki mannyer drog i detri tou rev.

Pa les personn enfliyans ou. En zanmi ki donn ou drog pa en zanmi. En vre zanmi i oule sa ki meyer pou ou. E drog pa'n zanmen le meyer, lavi san drog i sitan zoli ranpli avek lanmour ek lafyerte. Fer ou manmi, ou dadi fyer, pa vin en viktim - *stand strong* bann zanfan dir non a drog.

Mr Speaker, an 2011 mon ti ganny sans al vizit Leta Z-ini, kot mon ti vwar travay lo teren ki bann volonter i fer dan kominote. Depi sa mon'n annan en gran lanmour pou pep Ameriken pou en sel keksoz.

Zot en Nasyon ki vin ansanm pou plizyer lakoz e touzour pare pou pran bann aksyon volontarya. Depi *New York, Washington DC Louisiana, Pennsylvania, Texas ek Oregon* kot mon'n pase. Dimoun ti pe konstaman enplike pou fer zot kominote von meyer. E si zot vwar lenzistis zot pare pou fer en keksoz kont sa.

Fason ki zot organiz zot se form bann lorganizasyon ouswa lasosyasyon, asiste bann rankont piblik, fer donasyon finansyel, materyel, sir petisyon organiz demonstrasyon e pas lenformasyon avek kanmarad.

Dan sosyete Ameriken sa ki Gouvernman i fer i touzour enportan, me sa ki osi enportan se sa ki sak endividi i kapab fer pou demontre zot konsern e par zot aksyon enfliyans Polisi Gouvernman e determin fason sosyete i fonksyonnen e evalye-evolye plito.

Pou ki nou kontinyen zwir laliberte e loportinite dan nou pei, fodre ki sitwayen i angaze. Ozordi mon salye zefor bann volonter Seselwa ki enplike dan bann mouvman ki pe promouvwar diferan size, tel ki proteksyon lanvironnman, Losean, kriyote kont zannimo ; drwa zanfan ek bann madanm, bann ki pe konsyan siv nou popilasyon lo bann size parey

*Alzheimer, Otizm, Kanser, VIH SIDA, dyabet, latak e lezot size osi enportan.*

Mon ti komans mon lavi piblik, pa dan politik. Me koman en volonter pou *Special Olympics, Cancer Concern* e Lasosyasyon bann Pratkan Medya. Menm ler pa tou keksoz ki nou'n fer ki in en reisit, me mon'n aprann lenportans lavwa bann dimoun dan kominote ler zot vin ansanm pou kree en meyer vizyon pou lavenir.

Se sa aköz sosyete sivil i enportan, pou la demokrasi fleri e pou nou sosyete agrandi e amelyore i bezwen partisipasyon tou dimoun. Letan Prezidan Ramkalawan i eksprim son konsern lo larelev bann dirizan dan pei, mwan koman *MNA* mon bezwen trouv en solisyon dan distrik ki mon reprezante pou kre sa lankadreman e lespas pou fason bann zenn e fitir dirizan nou pei.

Dan sak distrik i annan plizyer loportinite pou sa ki annan volante pou avans devan e ganny loportinite devlope koman en dirizan dan plizyer domenn, enkli *sport*, lanvironnman, leritaz, kiltir, lantreprenarya eksetera.

Lo nivo distrik i annan plizyer mouvman, parey lazennes, trwazyenm az ki swa

Lotorite pe esey re lanse oubyen i nouvo. Pou premyer fwa sa lannen bann zenn in ganny sans partisip dan eleksyon pou elekte reprezantan zot lekol lo Lasanble Lazenés.

E mon profite pou felisit tou bann zenn ki'n brav e ki'n *step up*, zot in kre en listwar. Gouvernman LDS in donn nou zenn loportinite fer tande zot lavwa pou swazir zot menm lekel ki pou reprezant zot dan Lasanble Lazenés.

Alor loportinite pou rasanble, partisip e angaz aktivman dan lavi kominote i annan Mr Speaker. Me nou bezwen endividi pou vin devan e partisipe. Annou aret sa latitid sakenn asiz dan son kwen. Annou partisipe, annou koze. Annou fer en konversasyon, rod solisyon e annou pran aksyon.

Nou kominote i pou nou tou, nou dan LDS nou krwar ki sosyete sivil e partisipasyon popilasyon dan kominote e pei an zeneral i enportan. Koman parti ki o pouvwar nou anvi ekout e antann sa ki sitwayen Seselwa i oule dir konsernan zot kominote e zot lavi dan Sesel.

Sa i parmi bann rezon ki nou bann reprezantan politik i pas kot bann lakour dan sak distrik e nou bann MNA nou

annan en zour ki zot vwar piblik. Sa i rezon aköz Prezidan Ramkalawan pe al fer *meeting* piblik dan 26 distrik avek son *Cabinet*. E si Sesel i kontinyen kiltiv sa latitid partisipasyon, langazman sitwayen e defann laliberte lapres, drwa rasanbleman e permet dimoun organize lo nivo politik, nou pei pou touzour mars avek lafyerte e i pou kontinyen fer progre pou tou dimoun. Non selman pou zis pou en pti group.

Mr Speaker, bon governans e partenarya ant parti o pouvwar avek lopoziyon. San lopoziyon napa demokrasi. Pou annan en *l'état de droit* latransparans e rann kont sa lekilib ant mazorite e minorite i oblize egziste.

Depi 2020 nou pa'n vwar parti o pouvwar oprese Lopoziyon, ser zot partou kote ouswa servi medya e apel zot en pti group atoufer, lennmi larevolisyon, karya, parazit eksetera.

Prezidan Larepublik ti envit Dirizan Lopoziyon lo Komite *Platinum*. Dan Lasanble nou'n donn Lopoziyon *Chairmanship COGA* e nou'n donn zot plis reprezantasyon ki anba *Standing Order* zot pa merite. Lo *FPAC*, *COGA* e *Bills Committee* zot merit 2, nou'n

donn zot trwa. Si nou ti pe fer politik *apartheid* dan Sesel parey Dirizan Lopozisyon in akiz nou, eski nou ti pou azir konsyansye koumsa?

Sa i montre volonte *LDS* pou ankouraz Lopozisyon pou annan en rol konstriktiv dan nou zenn demokrasi. An retour ki nou vwar? nou vwar lopozisyon deside *boycott* premye louvertir istorik nou Lasanble e al lager avek en desizyon Speaker lo medya nasyonal.

Nou vwar en Lopozisyon ki kapon e taye letan i reste 5 *LDS* pou fer repons lo Leta Lanasyon.

**(APPLAUSE)**

**HON GERVAIS HENRIE**

Nou vwar Lopozisyon abes standar ki nou'n etabli labiyman bann *MNA* zonm dan bann seremoni ofisyel isi anndan menm ler zot ganny larzan palto. Nou vwar Dirizan Lopozisyon refize vin rankontre Prezidan Larepublik lo son larive isi kot Lasanble.

Ki kalite egzantp nou pe senmen parmi nou zenn popilasyon? Letan nou Nasyon i egzize ki Leta nou Nasyon i egzize ki Lopozisyon i azir dan en fason responsab e parey bann *l'homme est femme d'État*

parey lord protokoler i sertifye zot.

Dan Lasanble nou kontinyen swiv kontribisyon en lopozisyon ki'n pri dan negativite, ki zis kritike e vwar tou keksoz mal san ofer en solisyon. Koman bann Manm ki ganny peye avek larzan *tax* Seselwa zot annan en devwar pou zwe en rol konstriktiv e responsab. Zot la pou donn en alternativ pou bann solisyon Gouvernman.

Nou bezwen en Lopozisyon ki fer bann deklarasyon ki vre, pa enn ki son Manm i senm zis mansonz, mansonz lo *STC*, mansonz lo Minister Lasante, mansonz lo Minister Ledikasyon, mansonz lo Konmite Kato Nwar, mansonz lo pri lavi, mansonz lo *ASP*, mansonz lo pansyon dimoun aze, mansonz lo lapey Minis, mansonz lo rezim *tax*, mansonz lo karakter Prezidan.

Zansla pa'n zanmen enterese pou fourni okenn laprev pou sa bann deklarasyon!

**(APPLAUSE)**

**HON GERVAIS HENRIE**

Mr Speaker, bann move zans ki azir koumsa, bann move dimoun. Zot merit batir, plito

batiz zot lekor *United liars* e  
Lopozisyon ...

**(APPLAUSE)**

**HON GERVAIS HENRIE**

... e Onorab Pillay ler sa deklarasyon ki in fer avek ou Mr Speaker, mwan mon ava dir ek li ki li i pa *fit* pou *Leader* Lopozisyon dan sa pei!

**(APPLAUSE)**

**HON GERVAIS HENRIE**

Annan en Gouvernman ki'n ganny elekte demokratikman, pa ase pou garanti lape. Nou bezwen zefor tou dimoun pou promouvwar lape avek devlopman.

Parti minoriter pandan sa 2 zour in zis anmennen avek eleksyon 2025. Olye dir nou ki zot sizere pou nou fer pou rezourd sa ta

Problenm ki dapre zot Sesel i annan. 4 boug ki isi anndan lo en tiket *rebate* in annan lodas pou dir avek Prezidan ki in ganny 35 mil 562 vot ki i ti 8mil 377 vot an plis ki zot parti ki kolektivman zot 10 in gannyen dan Eleksyon Lasanble Nasyonal, demisyonnen.

Be sa bann move dimoun ki fer sa, move dimoun!

**(APPLAUSE)**

**HON GERVAIS HENRIE**

Mr Speaker, yer Onorab Loze in entrodwir en mo dan nou Lasanble, se mo "kapon." Ler en kapon i kasyet deryer en iminite *free speech* Lasanble Nasyonal e koz dan en ton konmsi li ki konn tou e i krwar ki son viktim pa pou kapab reponn li se sa ki apel *bullying*. Sa ki apel *bullying* !

**(APPLAUSE)**

**HON GERVAIS HENRIE**

Mr Speaker nou swe koman parti mazoriter, se pou vwar en Lasanble performan, kot tou Manm i pran son rol o serye. Parey nou demann bann travayer dan Servis Piblik pou fer depi Merkredi. Zot pe travay zot Servis Piblik, *US* in taye li i pa pe travay e sa i demann koup saler.

**(APPLAUSE)**

**HON GERVAIS HENRIE**

Koup saler.

*LDS* i reste angaze pou onor son bann promes fer dan nou manifesto lo paz 36 e 37 viz a vis nou rol isi dan Lasanble koman en brans Gouvernman.

Pou konklir Mr Speaker, les mwan dir ankor enn fwa i pa mon swe pou enpoz okenn plan

personnel lo distrik Mont Buxton. Mon anvi tou zabitan i zwenn mwan lanmwatye semen, pou nou ansanm tras en larout ki a transform sa pti distrik dan milye Mahe.

Zabitan fodre angaze, i pa manti si mon dir sa langazman pa pe vin osi vit. I annan en manni ler mon fini travay mon louvraz 8er – 4er, mon antre se mwan e sa ki pas an deor mon laport pa konsern mwan. Sa i tris, se pou sa rezon mon swazir tenm langazman kominoter, pou mon larepons lo diskour Prezidan.

Mr Speaker, mon pa en *superhero*, mon napa en baton mazik, mon napa larepons pou tou kestyon, e ni solisyon pou tou problem. Mon bezwen led tou dimoun dan distrik e i pa zanmen tro tar pou ou ki pe ekout mwan pou angaze.

Sa ki mon annan se volante pou transform laparans distrik Mont Buxton. Koman en *MNA* i annan en kantite proze mon'n inisye e enplimante avek kolaborasyon avek *Mont Buxton Community Association* e biro Ladministrasyon Distrik an a tandan ki nou kontinyen ankouraz zabitan Mont Buxton pou avans devan e donn en koudmen.

Depi 2020, nou pe travay avek plizyer lekol, Lafors

Defans, Servis Tenny Dife avek Sovtaz e Lotorite Prizon pou met lapropte dan distrik. Nou'n enstal bann sir ki demark komansman nou distrik Greenwich, Ma Joie, e Lari Beton.

Nou'n fer *bus shelter*, nou'n konstrir *bin site*, nou enstal ban kot napa ase lespas pou konstrir *bus shelter*. Nou pe met bann sir kouler ki endik direksyon bann landrwa popiler e enportan dan distrik. Nou pou osi met lansenny avek non tou *housing estates*, vilaz e menm bann, dan distrik byento. Non semen osi tou nou pou fer.

Nou pou enstal bann sir trafik, nou pou konstrir omwen 4 pti zarden piblik e nou pou ouver ankor *high trials* apard sa 3 ki deza egziste.

Pou tou sa bann proze napa en sou - mon repete napa en sou ki'n sorti dan Bidze Gouvernman. Alor mon profite pou remersye tou bann endividi ki touzour pare pou ede, mannyer zot kapab. Me sa pa vedir ki napa proze kominoter sorti dan Bidze pei.

An 2021 nou ti ganny R200mil e nou'n konstrir en semen e a grandi *playground* Mont Signal avek. An 2022, nou ti ganny R740mil. Malgre retar, 6 proze ki enkli renovasyon semen konstriksiyon peron e



pon e lagrandisman semen primer pou ganny fer avek sa larzan.

Mon profite pou remersye tou dimoun ki'n travay pros avek mwan, ziska la pou benefis distrik e zabitan Mont Buxton. Sa i enkli administrater distrik Ms Leandra Boniface ek son *staff*, bann *staff* ki travay avek mwan, Ms Antoinette Valentin, Antoine Barbe e Linda Gerry.

Mon le fer en mansyon spesyal e la bann dimoun Mont Buxton konpran mwan. Mr Cyril Payet, Peggy Ladouceur, Davis Louise, John Tirant, Nelson Hoareau, Raymonde ki travay kot Ladministrasyon Distrik e tou bann aktivis LDS, mon'n fer sa mansyon aköz sa bann dimoun vreman zot mon lanmen drwat.

I annan moman mon'n dekouraze e zot in enspir mwan pou nou *keep going, because the work is not over yet*. Annou kontinyen travay pou tou dimoun e amelyor bann kominote dan distrik Mont Buxton.

Mersi pou ou ki'n ekout mwan, me avan mon fini mon oule demann ou ankor. Ki kalite Sesel ou anvi depi konmela?

Pou sit ansyen Prezidan Leta z-Ini *Barack Obama*, se ou sa sanzman ki ou ti pe espere. Sanzman i komans avek ou, sa

zanfan, sa adolesan, sa adilt e sa dimoun aze ki regard ou dan laglas tou le bomaten.

Sa kalite Sesel ou oule i depan lo ki ou anvi fer pou ou prop lekor. Ou fanmir, ou kominote e pei. Ou langazman anver lezot i al bokou pli lwen ki ou, ou kapab pe mazine.

Wi, nou pei i annan defi, me osi loportinite. En langazman pozitiv de lapar nou tou pou transform Sesel e sa monn dan en meyer landrwa ki nou ti vin zwenn. Sa kalite Sesel ki ou le, i form parti sa sanzman, ki LDS e sey batir.

An 2020, nou ti vot pou sanzman aprezan annou siport sa sanzman. Annou partisip dan sa sanzman, annou viv sa sanzman. Me pli enportan annou selebre sa sanzman. Mersi Mr Speaker.

**(APPLAUSE)**

**MR SPEAKER**

Mersi Onorab Henrie. Mon aprezan pas laparol avek Onorab Francois Adelaide.

**HON FRANCOIS ADELAIDE**

Mersi Mr Speaker. Bonzour Mr Speaker, bonzour tou Manm koleg Onorab. Spesyalman bann dimoun Baie Lazare ki'n vot e met mwan dan Lasanble Nasyonal. Mr Speaker, ankor

enn fwa mon'n ganny sa privelez pou enterpret Leta nou Nasyon, apre ki Prezidan koman Sef *d'État* Sesel, in donn son apersi lo ki mannyer lannen 2022 in pase.

In donn son apersi kote koman en Nasyon nou ete, e ki mannyer nou bezwen azir a lavenir si nou oule progresse. En diskour ki'n fran, direk, byen artikile pour met sa pep o fe lo realite ki nou pe fer fas avek.

Wi, Mr Speaker realite ki nou aktyelman pe fer fas avek e prozeksyon ki nou kapab fer fas a lavenir. Sa diskour Prezidan in vremen met larealite dan son vre konteks, e sirman in sakouy bokou nou pour realize ki nou annan ankor bokou pou fer si nou oule reisir koman en Nasyon. Ti napa maltrete ladan, me ti annan bann parol for, fran e direk.

Souvandfwa, ler ou pa anvi tann parol ki ou anvi tande, ou sey detourn li. Ou rod tou sord leskiz zis pou tir latansyon lo bann vre sans parol.

Mr Speaker, vwala ki'n arive dan sa de zour deba. Diskour laenn, zalouzi e mansonz sorti kot parti minoriter pa'n manke. Zis pran sa dernyen parol sorti kot dernyen Manm Lopozisyon ki ti koze, ki'n dir ki mannyer zot

fristre avek diskour Prezidan. I pe menm mazine pour pran Prezidan, met li dan en sak, ansanm avek son *speech* e al zet li 3mil met kot i ti dir in al zet drog.

Eski se sa panse parti minoriter, ler zot pa tonm dakor avek lopinyon enn zot adverser? Eski zot ankor annan sa bann lespri lo ekstermin en boug, kan i pa pe fer keksoz dan zot fason? Eski se sa metod zot pe deside servi pour ariv *State House*? I annan diferan fason nou kapab montre nou mekontantman. Me sa fason pa devret zanmen enn ki ganny tolere. Akoz tou sa laenn? Akoz tou sa zalouzi?

Mr Speaker, mon osi anvi remersye tou envite ki ti prezan sa zour pour temwannayaz sa seremoni an antye. Mersi pour zot prezans. Mon asire ki zot in port byen atansyon lo mesaz Prezidan e nou pe kont lo zot tou dan en fason ou en lot, pou ede mannyer zot kapab pour edifye nou pep.

Zot prezans dan nou Lasanble Nasyonal ti vremen enportan, e nou'n vremen valoriz zot komikman, e nou remersye zot bokou pour fer letan pour vin asiste nou. San ki nou met okenn presyon lo zot, nou ti a kontan ki zot ed nou dan nenport ki fason e edik nou pep lo laverite.

An 2020, Sesel ti antre dan liv listwar koman tre pe pei Afriken ki annan en transfer pouvwar san okenn versman disan. Mr Danny Faure, dan tou son lenperfeksyon, i ti *rise above* son bann predeseser zot de Prezidan Ramkalawan. Zot ti fer sa aksyon ki sirman pou reste koman en senbol ki bokou Seselwa ti a pe enkyet ki tranzisyon ti a kapab dan en lot fason.

Mr Speaker, nou tro pti pour sa kalite politik revanz. Nou tro pti pour sa kalite politik laenn. Nou tou nou annan en manm fanmir dan bann diferan denominasyon, e okenn manev malsen pour destabilize sa pei e pou sirman afekte nou tou.

Mon en pe soulaze avek bokou Seselwa ki'n kapab epanouir, kapab zize, analize e decide. Ki zot dir ki Prezidan Ramkalawan pa ti pou vwar *State House*, sa boug in arive. Ki zot ti dir ki parti *LDS* pou reste dan lopoziyon, nou'n prouv zot mal.

Nou *motto* sete "Sesel pour tou son zanfana." Nou'n menm gard nou promes. Nou ti tonm dakor ki Sesel i bezwen ganny dirize par *the rule of law*.

Eski pa sa se sa prensip ki nou pe kontinyen mentenir? Bokou promes ki nou ti promet, nou ankor pe kit nou

langazman. Akoz sitan laenn, sitan mansonz e sitan zalouzi? Nou menm atann zot dir ki Prezidan pa ti'n prepare. Mr Speaker, sa ki konn sa boug, zot pou konnen ki sa boug i en boug spontane, *on the spot*. I reakte mannyer sityasyon i ete, e i fer li vremen byen.

**(APPLAUSE)**

### **HON FRANCOIS ADELAIDE**

Mr Speaker, kantite pozitivite la deor. Wi Mr Speaker, lavi la deor vremen i pa fasil ditou. Me tou i depan lo nou korperasyon anmezir nou debrouye dan nenport ki fason pour amelyor lavi nou fanmir, lavi nou pep e stabilite nou pei.

Sa Gouvernman dizour pe kontinyen diriz nou pep e nou pei lo en semen ver vre prosperite. Sa ki annan lizye i trouve. Me sa ki decide les ferm son lizye e les bann Manm minoriter get pour zot, sa i zot swa. Sa ki annan lentelizans i konpran. Me sa ki decide les bann Onorab minoriter, azir lo zot *behalf*, se zot ki pou bezwen pey lakonsekans.

Sa ki annan motivasyon, zot ankouraze, e zot pran tou sord linisyativ pour devlope e pou epanouir. Me sa ki decide les bann Onorab parti minoriter bat zot latet e dekouraz zot,

sirman zot pour regrete ler zot pour realize ki zot ti pe zis ganny servi pour bann rezon politik. Zis mazine ki *le conseiller, n'est pas le payeur*.

Mr Speaker, tou sa lensertitid ki lemonn pe fer fas avek, Sesel e mazorite Seselwa i kontinyen fikse son regar e son latansyon lo pozitivite e prosperite. Menm si nou konnen ki parkour lavi pa pou toultan dan nou faver, menm si nou sey nou mye. Sa i sirman in arive dan lepase. Nou kontinyelman fer fas avek dan nou lavi toulezour e nou pou kontinyen fer fas avek dan lavenir.

Sa ki lemonn antye in pas ladan tou resaman i byensir en leson ki mazorite nou ki pe viv pa'n zanmen eksperyanse. Me nou bezwen tir sapo avek sa lekip Legzekitiv ki'n premye lekip Sesel pour sibir e sirmont en tel evantyalite. Krwar ou pa krwar, la realite i devan nou prop lizye.

Si ti annan en lekritir ki ti dekrir ki mannyer tou keksoz ti pou ete, sirman ti ava en *plus* pou tou Gouvernman.

Ozordi ki mannyer lopoziyon pe konport zot, zot in pirman montre nou ki zot irresponsab e anv vwar *downfall* sa Nasyon. Napa en keksoz ki LDS i fer ki dan zot faver. Napa

en linisyativ ki Gouvernman LDS i pran ki bon. Napa en desizyon ki Gouvernman LDS i pran ki zot pa trouv lipou ladan.

Lopoziyon minoriter pe fer krwar ki tou keksoz pa bon. Si ou pa pe viv Sesel, ouswa si ou pa azour avek realite, ki mannyer zot koze, ou pou ganny sa lenpresyon ki Sesel i lo en *standstill* e napa naryen pozitiv dan sa pei. Eski sa i leka?

Mr Speaker, Bondye in pitye nou e nou'n kapab met Lasanble Nasyonal lo en lot nivo. Nou'n tann Onorab Uranie pe koz lo transformasyon ki pe donn zot lanflanmasyon. Wi. Onorab Uranie, sa transformasyon ki Lasanble in traverse, byensir i en legzanp pozitiv, ki pou sirman kontinyelman donn zot lanflanmasyon dan prosesis disparisyon.

Si sa 2an edmi, zot pe komans anvoy lavwa e dir zot pe ganny lanflanmasyon dan soulye Lopoziyon, mon pran pitye pour zot. I reste ankor apepre 2an ki zot pou bezwen reste dan sa menm pozisyon. Nou ki lo sa kote latab, nou'n deza laba. E i enportan pou zot konnen, ki sel fason ki zot kapab sorti laba se par bann travay dir. Kot ou edik ou pep lo en politik onnet e responsab.

Kot ou vreman vin en patriyot ki pare pour fer dibyen pour ou pei, non pa en teroris ki pe touzour mazin teroriz ou pep pou ou reste o pouvwar.

Mr Speaker, ozordi ler ou get partou kote, ou vwar bann progre, me parti minoriter pa trouv naryen. Zot in trouve ki nou *intellectually spent*, me ou ki pe viv dan Sesel, mon anvi ou fer sa refleksyon san pran okenn kote politik.

Ler en pei i pran en desizyon brav, rod linisyativ e ouver son pei, ouver son frontyer, pour permet son lekonomi anmars. Eski sa se bann dirizan ki *intellectually spent*? Konpare avek bann desizyon fou, etabli FA4JR ki ti napa okenn *oversight* e faid en pei. Seselwa zize pour zot menm. Lekel ki *intellectually spent*?

Ler bann *Leaders Parti Lepep* ti pe dir, aret tou bann proze kapital, aret fer lakaz, aret reparasyon bann batiman, menm aret sa proze pour ki Zil Pros i a ganny zot nouvo terminal pasaze, e deside pou met larzan a dispozisyon Seselwa pou depanse.

Lo lot kote, Gouvernman LDS i persevere. Nou konnen ki proze kapital i mars etrwatman avek devlopman imen. Ziska ozordi, nou pe kontinyelman fer

progre. Proze kapital pe kontinyelman ganny enplimante e pe ganny met a la porte pep Seselwa. Eski sa i ganny konsidere koman *intellectually spent*?

Mr Speaker, ler parti US i deside pou koup tou *scholarship* pou ki tou nou bann zenn etidyan pa kapab al etidye aletranze. Rezon se ki napa larzan aköz COVID. Lo lot kote, Gouvernman LDS i determinen, rod linisyativ e fer sir ki nou bann etidyan ozordi zot dan bann liniversite aletranze. Lekel ki *intellectually spent*, Mr Speaker?

Ozordi nou nepli tann size *Air Seychelles*. Eski sa Gouvernman pa vreman delivre? Legzanp tro bokou. Me mon'n servi sa konparezon zis pou met keksoz dan son vre konteks.

Mr Speaker, Prezidan in osi koz lo fristrasyon dan Servis Piblik. Enn parmi bann pli gro problem ki pe fer lavi bokou Seselwa en martir. Wi Mr Speaker, sa i en vre problem. Koman en Manm Lasanble ki'n ganny elekte dan en distrik ki en pe lwen avek lavil, kot mazorite biro Gouvernman i site, mon pe fer li mon devwar pour met presyon lo Gouvernman pour nou *deal* avek sa gro problem.

Mon'n deza drafte en kestyon lo bann mekanizm ki annan e ki pou ganny met an plas pou fer sir ki sa servis i a la oter. Mon konnen ki i annan bokou bann travayer dan Sekter Piblik ki donn zot tou. Sa i pa manti. Mon swe pour sa bann travayer se kontinyen ed sa pep. Enspir lezot ki pe ganny bann dekourazman e retourn zot lo bon semen.

Mon osi aprann ki par ler se bann lekipman kominikasyon ki al an defo. E sa osi fodre nou rezourd pou nou kapab amelyor sa problemn kominikasyon. Mr Speaker, nou bezwen al pli lwen. Met bann form pou ki piblik i a kapab donn *feedback* lo zot servis. Nou devret ankouraze pou rod meyer fason inovativ pou piblik kontribye.

Nou menm kapab fer li lo en rezo pour ki nou kapab debiste boner lo ki bann departman ki annan problemn, e donn priyorite pour nou amelyore. Mon pou osi zwenn tou mon koleg ki'n ensiste, ki lanfaz serye, i devret pe ganny mete lo okenn departman kot i annan travayer ki ganny demande pou fer sabotaz, trenn lipye e ogmant fristrasyon.

Si i annan sa mannev, mon pe demande ki tou aksyon disipliner i ganny pran pou

rektifye sa bann problemn. Mon pa espekte vwar okenn *PNQ*, ouswa *Urgent Question* ler aksyon disipliner i ganny fer ouswa i ganny pran kont sa bann akt sabotaz.

Mr Speaker, koman en Manm lo Komite Ladefans, Sekirite e Lentelizans, mon pa oule mank sa loportinite, pou remersye tou bann akter ki pe travay tre dir pou fer sir ki sekirite e stabilite nou pei i touzour alaoter. Mon konnen ki i annan bokou defi, me zot kontinyen persevere e delivre. Nou'n vwar bokou entervansyon kordinen ki'n anmenn bokou rezilta.

Mersi pou tou bann Manm Lafors Defans Sesel pour zot devosyon e komitman. Zot zefor i ganny byen apresye. Mon oule osi fer mazine ki Lasanble nou ti donn nou en komitman avek Lafors Defans pour regard dan kondisyon tou nou bann frer e ser dan *brass band*. Bann zofisye pe debrouye, fodre pa ki nou oubliy zot.

Mersi tou bann zofisye dan bann Departman Lentelizans Sesel. Kontinyen sa bann bon travay. Nou pei i depan lo zot pour nou stabilite. Mon oule remersi osi Lafors Lapolis Sesel, pour tou zot bann bon akonplisman dan mentenir

lord e lape dan bann kominote an zeneral.

Tou dernyerman, Baie Lazare in temwanny louvertir kordgard apre en pe letan anba renovasyon. Mou oule remersi tou bann zabitan ki'n kontinyelman met presyon pour ki sa fasilite i ganny remet a laporte nou zabitan.

Nou distrik in ganny en nouvo vizaz avek sa zoli kordgard, e mon fyer pou dir mersi Prezidan Ramkalawan ki'n tann mon plent. In ekoute, in vin vizite e in siport mon pour ki nou reganny nou servis lapolis dan nou distrik.

Ler mon lo sa size i enportan pour anvoy enn pti mo remersiman pour tou nou *Firemen* ki pe debrouye lannwit, lizour pou kit nou pei e nou bann propriyete sen e sof. Mersi pour tou zot zefor kontinyel. Sesel i fyer de zot e Lasanble osi i mazin zot.

Mr Speaker, sa ki'n pas Baie Lazare, sirman in konstate ki sa distrik pe bouze. Menm tre vit. Eski nou konnen aköz? Larepons i senp, sa Gouvernman i annan lenerzi, sa Gouvernman i konpetan, Sa Gouvernman i responsab e sa Gouvernman i konsernen.

Pran sa proze reabilitasyon Anse Gaulette. Mon oule dabor remersi tou

teknisyen dan bann diferan departman pour konpran lirezans sa proze. San zot, byensir, nou ti'n kapab vwar en de koneksyon dan servis transportasyon, dan trafik, servis litilite, mouvman imen, e nou ti pou kapab vwar bokou destriksyon lenfrastruktir dan nou distrik.

Mon oule osi remersi bann propriyeter ki'n aksepte pour donn *wayleave* pour sa premye faz proze kapab abouti. San bliye, mon oule osi remersi tou dimoun ki dan en fason ou en lot in ede avek sa proze, e mon demann zot pour servi sa lespas dan en fason apropiye e respekte vwazinaz.

Mr Speaker, sa ki'n pas Baie Lazare in kapab vwar sa proze *West Coast Development*. Seselwa, sa proze ti devret ganny enplimante depi en bon pe letan pase. Aköz ki sa proze pa ti'n demare? *Sponsor* ti la, larzan ti la. Sa proze ti dan lepok ler en serten nou ti dan pozisyon Minis. Eski se pa sa ki nou apel *intellectually spent*?

Zis 2 a 3 mwan apre ki *LDS* ti vin o pouvwar, tou le neser ti komanse. E ozordi mon fyer pour koz lo sa proze, aköz sa proze pe byen progresse. Sa proze pour sirman anmenn bokou soulazman pour nou distrik.

Mon egalman demann tou zabitan, sirtou bann propriyeter ki sa proze pe pas en pti bout lo zot later pour silvouple korpere. Sa proze pour sirman benefisyé nou tou.

Mazinen ki si ozordi nou kapab sorti anvil pour ariv kot nou Baie Lazare, byensir sa in posib akoz i annan bokou sitwayen ki'n bezwen donn bann pti bout later pour sa kapab arive e sa pe fasilite ou lavi. Silvouple, annou korpere e fasilite lavi nou kominote osi.

*Espérons* ki nou konpran kanmarad e nou distrik i kontinyen devlope. Mon byen kontan pou tande osi ki sa proze *pavement* pour kontinyen ziska *Banyan Tree*. Eski se sa ki parti minoriter pe dir ki Gouvernman i *intellectually spent?* Mr Speaker, ki mannyer mon pe gete, si ou tann Lopozisyon dir en keksoz ki *LDS* pe fer, pa bon, konnen nou lo bon semen.

Mr Speaker, mon pou osi koz en pe lo leta mon distrik Baie Lazare. Si i annan en distrik ki'n preski partou dan bann aktyalite, dan bann zournal, lo rezo sosyal, dan konversasyon bokou Seselwa e etranze, se pa lot ki nou zoli distrik Baie Lazare.

Wi Mr Speaker, Baie Lazare i dan bon lanmen anba

Gouvernman *LDS*. E sa lot *MNA* ki a vini pli tar, byensir pou bezwen mentenir sa oter devlopman e nou distrik ava kontinyen briye. Mr Speaker, zis mon a pas an bref enn de pti proze ki Baie Lazare sa lannen nou pou vwar nou kapab benefisyé.

Pa oublie nou annan nou Sant Lasante, ki larzan i deza dan Bidze, e byento zabitan Baie Lazare pou ganny en pti letan pou nou kapab diskite en pe lo la. Nou annan en koneksyon ki apre en bon pe letan nou pe espere pour bann zabitan ki reste *ex-Pool*, Anse Gaulette. Sa i en koneksyon *STP*, pou ki i a permet zot kontinyen bouze e retir sa bann problem loder ki tanzantan zot fer fas avek.

Nou annan dezyenm faz proze konstruksyon, 16 *unit* lakaz *ex-Hunt*. Sa pou byensir amelyor bann problem lozman dan nou distrik. An se moman nou pe netway en landrwa kot nou pou apel li en *Hot Stop Spot*, Anse a la Mouche. Sa i pou ede pou ki bokou nou bann artizan Baie Lazare a kapab montre e menm vin vann zot prodwir, e sa i ava ed zot pou zot ganny en reveni.

Nou pe osi travay lo bann nouvo *bus shelter*, enkli sa de ki pou benefisyé bann zabitan



*Santa Maria Estate*. Nou'n fini fer plan, nou pe deza konsilte e byento petet nou ava vwar sa proze komans demare.

Mr Speaker, Lopoziyon sel keksoz ki zot mazine se mont *State House*. *State House* ki zot oule retournen. Dan lavi, fodre ki ou annan pider e ou annan dinyite. Mwan mon pa konsider mwan koman en politisyen. Mon'n vin dan sa semen akoz mon ti annan zis en swa; pa zanmen vin soubalturn parti *SPPF*.

Wi Mr Speaker, mon pa'n vin dan sa pozisyon par okenn faver, ni larzan, ni akoz frekantasyon. Mon ti vin fran, donn mon letan, mon devosyon e menm mon lavi pour defann zentere zabitan Baie Lazare e pep Seselwa. Akoz parey mazorite nou, mon ti'n ganny ase avek bann move tretman, bann prensip pa popiler ki nou ti pe ganny andoktrinen pour nou viv anba.

Zabitan ti fer mwan konfyans. Pa en fwa, me de fwa, akoz zot trouve ki mon en boug aksyon, en boug debrouyer e en enspirater. Si ler mon ti met mon dezyenm manda, zabitan ti desid otreman e decide ranplas mwan, zanmen e zanmen mon ti pou pran sa *mask* mouton ki Lopoziyon pe pran ozordi, pour vin portre zot koman bann

liberater. Kan o fet, se zot ki arsitek e kontrakter sa ta problem ki nou pep pe fer fas avek e ki pe koz bokou malez dan nou sosyete.

Problem drog dan Baie Lazare pa devret ganny met anba tapi. Wi, nou annan en problem serye e nou bezwen atak li. Bokou dimoun i fristre avek sa sityasyon. E mon oule enplor Lotorite konsernen pour kontinyelman met tou zefor pour konbat sa fleo.

I enportan pour Seselwa konpran, e fodre zanmen zot oublie lekel ki responsab pour sa problem.

Mr Speaker, ozordi sel swe lopoziyon se retourn *State House*. Si zot in kit zot lakord lonbri laba, mazine in fini pouri. Ki privez ki zot in perdi anler laba *State House* ki zot ganny kosmar retournen? Sikatris defet ankor remarkab lo zot figir, dan zot parti e lo vizaz zot siporter. Boubou pa ankor ni geri, zot oule grenp ankor baro *State House*. Ki zot in kite *State House* e ki zot oule retournen o pli vit posibil?

Mon byen kontan tande ki zot pe pas dan bann distrik e pe fer semafor. Mon osi kontan pour tande ki zot in pas Baie Lazare. Zot in kapab konstate ki sa distrik pe bouze. Parey mon'n toulturn dir, mon konnen

ki nou bann zabitan in akey zot tre byen e zot in ganny sans dyaloge. Akoz nou en distrik ki annan lakourtwazi e nou dimoun i zantiy.

Me sa ki zot bezwen byen mazine se ki dan Baie Lazare, laplipar zabitan lizye in ouver, zot annan bokou lentelizans e zot azour avek realite. Pa mal enterpret sa lakey. Bann mesaz ki zot in senmen konmkwa ki zot pou rebran Baie lazare e retourn nou distrik an retar, pa pou ariv ankor.

Mr Speaker, parmi tou sa determinasyon pour vwar en nouvo Sesel parey mazorite nou, mon osi mon annan en gran lenkyetid. Mon ti pe swete ki pandan sa de lannen avan nou ariv lo prosenn eleksyon, mon ti a kontan ki Sesel ti ava kapab prodwir en group politisyen serye, rezonnab e kouraze; ki pou kontribye pozitivman avek bann ideoloji ki kapab anmenn en diferans e met lanmour dan nou zoli pei Sesel.

Avek sa kalite retorik ki mon'n tande, sirman i reste en size konsern. Kot ler nou pe demande ki nou tou nou delivre e donn lanmen fer nou pei bouz devan, kot napa plas pour trenn lipye, nou tann dir ki sa prensip pa bon e sel solisyon se desann lo semen. Kote nou pou ale avek

sa bann latitid? Si parti minoriter dan Lasanble pe anvoy sa bann mesaz koumsa la deor, eski sa pa en siny konsern?

Mr Speaker, an konklizyon, mon anvi dir avek mazorite Seselwa ki sel parti ki kontinyen e pou kontinyelman anmenn prosperite pour Sesel, se pa lot ki LDS. An mezir nou kontinyen fer progre, byensir pou annan bokou manev e rimer ki pou sey vin diviz nou. Fer bokou atansyon e reste alert. Lopozisyon pou rod tou fason pour sey destabiliz nou trankilite. Zot pou rod tou fason posib pour vin anbet sa ki pli feb.

Mr Speaker, nou bezwen kontinyen tyonbo lanmen kanmarad. Nou bezwen inyor tou sa bann tapaz e konsantre lo nou travay. Nou sikse pour evidan ler nou pou kapab protez sa enn ki pou pli feb dan nou groupman. Annou kontinyen reste bann lenstriman lape.

Parey mon kontan dir, kot pou annan laenn, nou pou bezwen senm lanmour. Kot i pou annan lerer, byensir nou a kontinyen met laverite. Kot i pou annan dout, nou a kontinyen met lespwar. Kot i annan fernwanr, nou a kontinyen met lalimyer, e kot i

annan sagrinasyon, nou a kontinyen met lazwa de viv.

Avek sa bann prensip nob, personn pa pou derout nou, lo kree en meyer Sesel pour nou, pou nou zanfan e nou fitir zenerasyon. Parey tou bann patriyot ki'n koze avan mwan, les mwan osi re afirm mon langazman anver mon pep e mon pei Sesel. Ki zanmen e zanmen mon pou les tonbe mon pei Sesel e tou son bann zabitan. Mr Speaker, mon a dir ou mersi pou akord mwan sa letan.

**(APPLAUSE)**

### **MR SPEAKER**

Mersi Onorab. Mon aprezan donn laparol Onorab William.

### **HON WAVEN WILLIAM**

Mersi Mr Speaker. Bonzour pep Seselwa e tou dimoun ki a lekout. Mr Speaker, sa ki mon pe al koze i pa en lenvansyon. Mr Speaker, sa ki mon pe al koze, sa ki mon pe al dir, i fonde lo realite travay ki sakenn de nou koman Manm Elekte, i enn nou rol primordyal, se enn, rankontre piblik, fer *visit*, fer konnesans avek realite, e konsyan ki pep pe dir e i anvi e i pe anvi bouze vizavi son devlopman personnel dan pei.

Mr Speaker, i vre ki zonn pa viv par zis dipen tousel. Me i viv par tou parol ki sorti dan labous Bondye tou pwisan. I evidan Mr Speaker, ki son lagras ek son faver i lo nou pti pei Sesel.

Mr Speaker, permet mwan remersi zabitan Grand Anse, Mahe, pou sipor kontinyel. Sirtou bann aktivis *LDS* lo bann diferan Komite ki pa'n zanmen les tonbe, me pe travay ek plis determinasyon pou motiv sitwayen distrik pou partisip dan sa program transformasyon. Menm si zot *US* ouswa *One Seychelles* e bann ki deor, parmi lezot, pou fer nou pei avanse.

Mr Speaker, sa ki motiv mwan toulezour se mon relasyon ek Bondye Tou Pwisan, ki donn mwan sa lafors e kouraz pou kontinyen pou fer sa ki byen pou pei. Mr Speaker, mon osi remersi li pou sa fanm for a kote mwan, mon *partner*, ki osi rezonn ek mwan e siport mwan pou mwan fer sa travay ki pep distrik Grand Anse, Mahe, in demann mwan pou fer.

Mr Speaker, enn mon rol enportan se *visit* zabitan distrik. Mon'n fer sa Mr Speaker depi 1989. Ti annan en *break* pandan 2011 pou 4an. Mr Speaker, mon'n rebran sa

mision an 2016, ziska konmela.

Mr Speaker, mon anvi asir Mr Lawrence, ki zabitan pe diskite ek son bann reprezantan, e reprezantan pe zwenn avek bann zabitan pou diskite. Se sa ki permet nou demann Minis keston isi dan sa Lasanble; anmenn Mosyon, e sizer solisyon posib ek Gouvernman.

Mon siport diskour Prezidan dan tou son sans, Mr Speaker, ki'n tous lo bann problem ki pei e pep pe fer fas avek. Se sa rol en Prezidan, se donn direksyon, menm si sa direksyon pa pou satisfere lot kote latab.

Mr Speaker, pep an 2022, atraver demokrasi in swazir en Gouvernman, bann dirizan pou reprezantant zot dan bann distrik. Mr Speaker, pep ti annan en swa. En swa ki zot in fer lo non la demokrasi. Lot kote latab i bezwen respekten lavwa Lepep.

Propozisyon Bidze 2023 in etal direksyon plan devlopman sosyoekonomik Sesel. Si lot kote latab ti ekspekte en lot diskour Bidze, eskize si zot lekspektasyon pa'n ganny zwenn. Prezidan in met lanfaz lo problem ki kapab anpes ouswa sabotaz sa plan devlopman Nasyonal ver *nation building*, ouswa batir lanasyon.

En keksoz ki ti kapab retard plan devlopman Grand Anse, Mahe e pei.

Mon remersi Senyer Bondye Tou Pwisan, ki sa pa'n arive Gran Anse, Mahe. Ti pou kout lavi bokou dimoun, sirtou siporter *US*, ki konsantre dan sa rezyon, si sa bonm ti ganny mete lo stasyon petrol. Sa ki ti annan nide fer Grand Anse, Mahe eksploze, pa'n arive fer li Mr Speaker e zot pa pou zanmen fer li arive.

Mr Speaker, lekel ki pe defann zot sa bann dimoun? Larepons ki zabitan Grand Anse, Mahe bezwen pe rode. Mr Speaker, me letan serten kous popilasyon i serye ek Bondye, nou pa pou per zot, me nou pou kontinyen pile, tans ki Bondye pe vey lo nou pei. Person pa pou tous nou. Nou pou kontinyen pile toultan pou anmenn sanzman e transformasyon kot i neser dan sa pei.

**(APPLAUSE)**

### **HON WAVEN WILLIAM**

Dan sa 2an, mon'n apresye ki Prezidan Ramkalawan, e mon asire ki pep Seselwa zot in trouve bann sanzman, e zot in apresye bann keksoz e demars pe ganny fer pou anmenn sa vre

transformasyon dan devlopman pei.

Mr Speaker, travay pou touzour bokou e Prezidan pa'n dir ki tou keksoz i *ok* dan sa pei. Prezidan pe senpleman demann pep pou zwenn ek li pou elimin sa bann malez ver devlopman sa pei. Akoz resours imen Mr Speaker, se resours imen ki fer keksoz arive e nou bezwen adres malez ki annan pou fer avek resours imen.

Mr Speaker, sa bann menas bonm ouswa lezot, nou pou bezwen pran zot o serye. Akoz zabitan pe demande si *US* in perdi eleksyon, si zot pou fer koudeta dan lavenir? Mr Speaker, Gouvernman pou bezwen *deal accordingly* ek bann swadizan sabotaz dan *PUC*. Met dife, nou bezwen pran sa bann keksoz o serye Mr Speaker.

Par egzanzp, sa let ki'n ganny sirkile lo zafer goute, ki annan koman sipor non en Minister. Mr Speaker, mon pa vwar li normal ki *PS* i monte, konmsi ki mannyer i pe eksplike, nou pa pou al fer resers pou nou rode ki bor sa let i sorti. Osi lontan ki nou pa fer sa Mr Speaker, nou pa pou konn vre realite e laverite. E sa pep pou kontinyelman doute.

Mr Speaker, i bon ki sa pep dan tou son kous sosyete i

senserman demann sa ban kestyon swivan. Ou ki sa zonm ek fanm dan pei sa sitwayen Sesel, ki direksyon ki nou anvi ale? Kwa ki nou kapab fer pou ede pou avans pei pli devan? Ou paran, ou bezwen demande ek ou lekor, ki direksyon nou anvi nou zanfane e kwa ki nou pe fer pou asire ki nou zanfane i satisfere nou?

Ou sa zanfane e sa zenn ki pe lekol, ouswa pe etidye aletranze. Ou bezwen demande, kwa ki ou anvi *achieve* dan lavi? Eski nou pe les nou ganny enfliyanse ek bann bon *role model* pozitiv, ouswa sa ki pou gat nou lavenir?

Mr Speaker, sa zenn profesyonnel, e ou sa travayer, swa dan Sekter Prive, ouswa dan Sekter Piblik, ou bezwen demande kwa ki ou kapab fer pou anmenn sa sanzman e sa transformasyon ki merite dan servis pou benefis pep e pei?

Ou sa anlwayer, kwa ki ou pe fer pou motiv e gard ou travayer pou ed ou grandir e pei kree larises? Ou sa lorganizasyon non-gouvernmental, ki zot pe fer a kote Gouvernman pou ede e siport sa transformasyon pozitiv dan pei, san ki nou les politik diviz nou?

Finalman Mr Speaker, Sekter Medya, eski dan zot rol

enportan dan donn lenformasyon, zot pe fer tou pou donn en balans, dan asir on lenformasyon ki vre realite e bon nouvel dan pei? Ki sa pep a kapab ganny sa vre realite lenformasyon ki pase dan son pei.

Mr Speaker, nou lafors lazenes i la relev demen. Nou tou nou pou bezwen sed laplas ek bann fitir dirizan. La serten kous zenn pe vwar li normal pou koup kanmarad. Zot pe vwar li normal pou dans endesan, zot pe vwar li normal pou fer la pares. Zot pe vwar li normal pou zot pa pran zot letid o serye. Zot pe vwar li normal pou kas keksoz. San realize, ki se travayer Seselwa ki'n kontribye pou fer sa bann keksoz atraver travay dir.

Mr Speaker, apre tou, sa ki lot kote latab pa pe dir ek sak sitwayen, ki se mwan, ou, nou tou, ki form parti Gouvernman. Se pa Prezidan Wavel Ramkalawan, *State House*. Pa zis bann Minis ouswa bann Manm Lasanble, me nou tou ki form parti Gouvernman.

I regretab pou vwar serten lakour, ki lapovrete pe antre Mr Speaker. Pandan *visit*, en manman ti dir avek mwan ki son fiy - ler in dir son fiy al tir lenz lo lakord, i dir son manman, espere. Son manman

pe balye deor pe degaze pou al travay. Ler i pe rod son fiy, be son fiy i lo lili vant anler avek telefonn.

Mr Speaker, se pa sa bann kalite keksoz ki nou anvi, ki paran i anvi pas atraver dan lakour. Serten zot kontribisyon lafen dimwan menm bann zenn, pa sifi kot lakour Mr Speaker. I ras ker pou vwar en paran pe rente an plis, pou soutenir son fanmir, kot napa linite ant manm fanmir. Kot tou depans Mr Speaker, i mor lo sa paran, ouswa lo sa trwazyenm az ki pe resevwar son pansyon.

Mr Speaker, eski sosyete pou kontinyen sa latitid lesefer, tolere, konpromi ek bann fason fer ki pa dezirab?

Mr Speaker, pa i byen ki Prezidan in donn direksyon pou sov nou sosyete. Si i pa fer li, lot kote latab pou kontinyen akiz li pou mank gidans. Sa ki mon kontan se ki mon Prezidan in fran. In bezwen dir. Menm si serten pa kontan, ki la mon krwar ler i ti dir, "Me la mon krwar ou pe tro ale".

Se sa ki Prezidan pe dir ek pep Seselwa. Ki la mon krwar nou pe tro ale. Annou adres nou fason fer. Zwenn ek li pou batir sa pei. Mr Speaker, se sa direksyon. Se sa direksyon ki nou bezwen apiye. Se sa direksyon pozitiv. Sa pou donn

lespas bann paran dan lakour, kot i annan problem, pou ganny kouraz pou dir ek bann zanfan, 'La mon krwar zot pe tro ale'.

Mr Speaker, ozordi, pep i note ki si Gouvernman ti'n ekout Lopozisyon e met tou proze lo *hold*, kot nou ti pou ete avek devlopman lo sa bann en fra striktir ki nou byen bezwen? Mr Speaker, diskour Prezidan in adres keksoz parey i ete. In annan lafransiz la realite aktyel.

Mr Prezidan, ou'n ganny elekte pou diriz pei. Pa bezwen pran presyon personn ki anvi fer ou ganny deroute dan ou parkour.

Lopozisyon ki ti dan Gouvernman, ki pep in fer son swa governans, zot dan problem. Keksoz ki zot pa ti kontan letan zot ti dan governans pei ki ti mal sa letan, ozordi zot vwar sa bann pratik bon e apropiye pou zot servi ozordi.

Mr Speaker, zot koz lo linite. E atraver zot fason fer, zot pe polariz sa tandans negativ ek plis divizyon dan kominote e dan pei, parmi sa pep. I pran bann gran dirizan parey Wavel Ramkalawan pou donn legzanp, par diriz pei, anba en tenm ki ini Lepep, anba tit, 'Sesel pour tou son zanfan'.

Menm si Prezidan Faure i merit ganny felisite, in fer li. Menm si in tir en portre avek Prezidan Michel, in fer li. Wi, en letan i ti dir i pa pou fer li. Me in *rise above*, pa pou li, me pou montre direksyon ver rekonsilyasyon nasyonal e lape dan Sesel.

Parey in dir, i Prezidan. Kot i konsern sa bann endividi, in fer zot, i annan Lalwa e bann Lazans konsernen ki pou *deal* avek bann sityasyon ouswa bann keksoz ki pe sirkile la dan sosyete, ki sa bann dimoun in swadizan fer.

Kot i konsern Servis Piblik Mr Speaker, kontrerman ek sa ki Prezidan in dir, mon pou dir li en lot fason direk san ki mon ofans bann Minis. Se zot ki ansarz a latet zot bann Minister e zot ki pe administre. Zot bezwen fer tou posibil pou asire ki zot servis pe mars byen.

Kestyon ki mon demande, eski zot azour ek sa ki pe vremen pase dan zot Minister? Si keksoz pa pe marse, lekel ki nou pou blanmen? Si travayer ouswa zot osi ki pa pe swivre lasenn sa bann servis pou donn direksyon?

Mr Speaker, la mon pou donn enn de legzanp. Mr Speaker, si en Minis avek en gran delegasyon in vin fer *visit* dan distrik, nou'n vwar plizyer

keksoz, nou'n fer komitman lo teren kot nou'n dir dan 2 semenn, dan 3mwan, dan 1mwan nou pou rezourd serten problem. Akoz ki nou pa vwar progre lo sa bann komitman e desizyon ki'n ganny pran lo teren?

Akoz ki Manm Lasanble i bezwen deryer ou pou kapab ganny en apwentman, pou nou kapab konnen kote, ki pozisyon sa bann tel proze i ete?

Mr Speaker, sa i pa byen. Sa i pa byen akoz tou sa bann zofisyè ki pe travay, zot pe ganny en saler, zot pe ganny peye pou donn sa servis.

Mr Speaker, nou annan en gro lekspektasyon avek nou lafors sekirite, sirtou lapolis. Mr Speaker, me dan mon rezyon, si sa bann Stasyon Lapolis pe fonksyonnn avek 50poursan zot lafors mendev, nou pa pou kapab ekspekte mirak avek zot. E si zot mank bann lekipman vreman enportan, pa ekspekte ki zot pou fer mirak.

Mr Speaker, olye met presyon lo zot, annou vwar ki fason nou kapab motiv zot plis. Par egzansp, par asiste zot avek transpor pou al kot zot e retourn kot zot Mr Speaker. Menm revwar bann *package* saler ki zot gannyen, Mr Speaker. Par lefe. La mon pe dir par lefe Mr Speaker, ki nou

konnen pou dir zot pe fonksyonnn avek 50poursan lafors e ki zot pe donn zot tou.

Mr Speaker, mon pou al lo seksyon *welfare*. Mr Speaker, problem dan mon distrik ki mon pe fer fas avek, Mr Speaker, i pa rezonnab, e mon pa konn okenn landrwa dan Sekter Piblik ouswa dan Gouvernman ki annan en *job* ki apel *light duty* Mr Speaker.

Si *Board* Medikal in preskri ki sa dimoun i bezwen fer *light duty*, E dan Sekter Piblik, ouswa dan Sekter Prive, napa sa responsabilite *light duty*, Mr Speaker, sa bann dimoun pou napa travay.

Mr Speaker, e ler zot al kot *welfare*, si sa zafer *light duty* pa egziste Mr Speaker, baze lo zot rezon medikal, mon pa vwar rezon ki sa bann dimoun i bezwen ganny fer pini. Monte desann, pou zot kapab prouv zot ka pou zot ganny en lasistans. Mon pe demande ki sa i ganny revwar silvouple.

Mr Speaker, i pa normal osi, si en manm lafanmir, akoz sityasyon mannyer i ete, i bezwen kit son travay, pou li al travay avek enn son vye dan lakour. Ki nou bezwen pran letan pou nou kapab zistifye ouswa aprouve ki sa dimoun i kapab travay avek son manm fanmir.



Mr Speaker, i annan dimoun la deor ki'n kit travay, ki pe espere e ki lafen dimwan i annan zanfan pou li kapab ... Ki i bezwen nouri. Me i pe vwar li lafen dimwan pa pe ganny en saler, si son ka pa ganny aprouve. Me in bezwen kit son travay, in fer en laplikasyon, me papye pe perdi, e zot pa ankor kapab donn en larepons. Sa Mr Speaker, koman Manm Lasanble nou pa kapab aksepte sa.

Mr Speaker, fer biznes. Mr Speaker, bann dimoun ki pran *risk* pou al dan biznes, zot fer li akoz;- enn, zot pa anvi depan lo Gouvernman pou ganny *welfare* ouswa lasistans. Zot fer li akoz zot anvi debout lo zot menm.

Me Mr Speaker, *the ease of doing business*, nou'n koz bokou lo la, me i ankor en gro problem. I ankor en gro problem e mon demande ki sa prosesis i ganny regard ladan.

Mr Speaker, mon pou donn ou en legzanp - La zot pe dir tou bann pti *retailers* al rod *cash machine* Mr Speaker. Fantastik sa, tou dimoun i kontan sa. Me Mr Speaker, ti a bon osi ki nou dir, be al laba, ou a kapab aste *cash machine* pou ou servi. Ou pa kapab dir en bout, ou dir li annan, be selman dan pei napa en landrwa sa

boutikye pou ale pou li aste sa *cash machine*.

Nou bezwen donn nouvo lenformasyon konplet, akoz mon pa krwar pou dir bann ki napa pa anvi fer li. Me i bezwen annan en landrwa. Provizyon i bezwen ganny fer e letan i bezwen ganny donneren pou tou sa bann boutikye kapab ganny sa bann *cash machine*. E Mr Speaker, mon pe demande ki sa prosesis osi i ganny regard ladan.

Mr Speaker, nou'n al partisip dan en *forum* enternasyonal e nou'n retournen. Mr Speaker, ti enteresan bann size ki pe ganny diskite. Bann size ki konsern sekirite alimenter, bann size ki konsern sanzman klima, bann size ki konsern lape, sekirite e la tolerans, e *peaceful existence* parmi sosyete Mr Speaker. Mon'n kontan e apresye kozri ki Vis-Prezidan in fer yer swar dan nouvel.

Mr Speaker, me i annan en travay enorm ki nou bezwen fer pou nou fer sir ki sa bann size ganny entegre dan bann Lazans Gouvernman e pli enportan dan lekol, Mr Speaker. Akoz se sa zenerasyon ki pe vini ki pou sanz fason fer.

Mr Speaker, i annan sa nesosite Mr Speaker, ki en diskisyon senser i ganny fer

avek bann fermye, bann prodikter lokal. Mr Speaker, tou kart i bezwen ganny tale ater. Realite i bezwen ganny mete devan tou parti konsernen. Pran en desizyon pli byen enformen e pli byen balanse i ganny pran vizavi asire ki Sesel sa laspe sekirite alimanter, nou pran li o serye.

Mr Speaker, nou remerci Bondye ki nou pa pe ganny tape avek bann siklonn ki pou aplati nou, nou pei, e fer nou plonz dan bann sityasyon ki nou vwar dan lezot pei. Ki fer zot pa kapab resorti koman en pei vizavi zot devlopman ekonomik, sosyoekonomik zot pei.

Mr Speaker, la mon demande ki Komite Sekirite Alimanter avek Devlopman Soutenab, zot pran sa o serye, pou kapab swivre.

Mr Speaker, lasante. Mr Speaker, i annan en travay ki bezwen ganny fer o nivo lekol bann ners. Mr Speaker, ou avek mwan, nou rapel bann vye ners lontan, sa lanmour, sa lanvi travay ki zot ti annan dan zot sektor. Mr Speaker, me nou servis lasante ozordi pe ganny afekte avek bann diferan kalite malez. Ki mon konnen poudir Prezidan i okouran. E mon'n tann li dir ki sa bann keksoz fodre i ganny adrese.

Mr Speaker, i enportan ki Gouvernman i vin pli proaktiv, me an menm tan parey mon'n dir taler, se pep Seselwa li menm li ki form parti, osi Gouvernman. Sakenn de nou, dan nou bann diferan rol, nou pou bezwen fer nou bout.

Mr Speaker, sak Minister ek son bann travayer, zot bezwen *accountable* lo tou sa ki arive dan zot Minister. I *accounting*, i *purchasing*, i *survey*, i nenport servis ki tonm anba zot responsabilite, zot bezwen *accountable* avek pep Seselwa.

Si i annan problem, nou dan sa Lasanble nou bezwen kriy Minis la anndan e demann li kestyon. Sa i nou rol Mr Speaker, e bann Minis i bezwen konpran sa.

Mr Speaker, i pa avek en lentansyon pou nou atak zot dan en fason personnel, me nou anvi vwar keksoz aranze e keksoz rezoud.

Mr Speaker, sitwayen Grand Anse, Mahe, i soulaze ek proze lakaz *Vilaz Orchid* ki pou demare dan lavenir. Nou'n ganny dir ki pou annan 80 lakaz ki pou ganny fer. I annan zabitan ki pe espere depi 8an, 10an. E la mon dir, bann zenn fanmir ki'n fer laplikasyon ki pe peye, silvouple kontinyen peye, pa arete. Akoz si ou arete,

demen pa ekspekte ou pou ganny en lakaz.

Mr Speaker, mon osi anvi lans en mesaz avek bann ki pe al fer zanfan, oubyen planifye. Fer zot laplikasyon byen boner, ou ava al lo en lalis. San fer en laplikasyon, pa aksepte ou pou ganny rekonnèt par Minister Zafer Lakaz ek Later pou ou ganny en lakaz a lavenir.

Mr Speaker, mon dakor ek Prezidan ki fodre nou fer adres sa problem anti-sosyal dan pei ki serten dirizan pe apel danse modern. Non, be seryezman? Ant danse avek avertisman lekor, nou bezwen konnen kwa ki nou fer an piblik e dan kasyet. Si nou bann zenes...Nou annan zenes ki byen formen e en sosyete pli rezilyan, Mr Speaker, nou pou bezwen adrese. E se sa ki Prezidan pe demande.

Prezidan pa pe dir avek bann artis, ouswa bann organizater, pa bezwen organiz zot bann aktivite. I pe zis dir zot e demann avek zot, konsyan ki nou annan lazènes, nou annan zanfan e nou anvi bon sitwayen demen pou diriz sa pei. I pa byen ...

### **MR SPEAKER**

30 minit Onorab silvouple.

### **HON WAVEN WILLIAM**

... i pa byen, Mr Speaker.

### **MR SPEAKER**

Konklir.

### **HON WAVEN WILLIAM**

Mon pe konklir. I pa byen pou en dirizan dir ki napa direksyon dan ki sa ki Prezidan pe dir.

Mr Speaker, an terminan, mon anvi remersi ankor enn fwa tou travayer Seselwa ki pe travay dir, ki pe kontribye pou fer avanse sa transformasyon atraver bann sanzman ki program Gouvènmàn pe egzize ki anmennen dan pei.

La ankor mon oule remersi ou Mr Speaker, tou *staff* Lasanble, ki'n ede anmenn sa transformasyon isi dan nou lenstitisyon, e pou zot vizyon lonterm ki zot annan. Mr Speaker, nou apresye sa bokou e ankor enn fwa, mon demande ki Bondye Tou Pwisan i kontinyen met nou dan sa laklerte e dan sa direksyon ki i merite nou pran. Mersi bokou.

**(APPLAUSE)**

### **MR SPEAKER**

Mersi Onorab. Mon krwar pou nou donn konsantrasyon bann Manm ki reste pou adrese, ti a bon nou pran en poz la. Me mon a *limit* zot poz en pti git, e nou a rebran travay 11er15. Mersi.

**(BREAK)**

**MR SPEAKER**

*(Mic-Off)*

Laparol pou Onorab Norbert Loizeau.

**HON NORBERT LOIZEAU**

Mersi Mr Speaker. Byenveni apre sa labsans, sa bon vwayaz apre sa travay dir ki ou pe fer *SADC-PF* menm i annan pa kontan.

Byenveni dan nou Lasanble. Mon anvi dir bonzour tou Manm. Tou mon bann Manm lo kote *LDS* lo nou *Caucus*. Deputy Clerk. E tou bann mon bann frer, mon bann zanmi dan Lopoziyon ki pe get nou an sekre lo lekran.

Mon anvi dir en bonzour tou Lepep Seselwa deor ki a lekout. Sirtou mon bann zabitan dan distrik Bel Air ki'n fer mwan konfyans e met mwan lo sa sez ki ozordi mon pe asiz lo la.

Mr Speaker, Leta Lanasyon, (*SONA*) i en moman kot tou Prezidan ki a latet en Gouvernman dan zot manda zot ganny sans vin adres lanasyon Seselwa.

Dan lepase i annan ki ti fer bann diskour Bidze dan plas Diskour Leta Lanasyon. I annan ki ti vin zis parey Onorab

Henrie ti fer sorti, ki ti vin zis maltret son oponan.

Me Prezidan Ramkalawan li, in vin koz lo ki mannyer i santi anver nou pei. In vin koz lo son fristrasyon. Mr Speaker, lo lafason keksoz pe marse - pe ganny fer.

Prezidan Ramkalawan, Mr Speaker in koz Kreol menm si i annan ki'n ekoute pa'n konpran Kreol.

E mwan Mr Speaker apre ki mon'n ekout bokou lentervansyon, sirtou lentervansyon bann Manm dan Lopoziyon. Permet mwan Mr Speaker, pou komans mon lentervansyon par rann en parkour listwar politik Sesel depi dan bann lannen '60, ziska lendependans, ziska ozordi nou dan miltiparti.

Dan bann lannen '60 ti annan en parti politik ki ti ganny formen. Sa ti apel *SIUP Seychelles Islanders United Party*.

Mr Speaker, mon pe rakont sa pou nou ganny en konpran kwa sa lopoziyon ki nou pe *deal* avek.

Avek larive Mr Rene apre son letid aletranze i ti zwenn avek sa parti e zot ti form *SPUP (Seychelles People United Party)*.

Pandan sa letan Mr Speaker, ti osi annan parti

demokratik ki ti ganny dirize par Mr James Mancham. Pandan sa bann letan dan bann lannen '70, 1970 Mr Mancham ti *Chief Minister*. E apre pli tar dan bann lannen '74 i ti vin Premye Minis.

Pandan sa letan *SPUP* ti ganny dirize par Mr France, Albert Rene defen. Ki ti dan Lopozisyon. E koman en Lopozisyon Mr Speaker, napa ki zot pa ti pe sey fer pou destabiliz pei sa letan. Zot ti fer lamars kont etranze. Zot ti met dife. Zot ti met bonm dan tant vakwa *Reef Hotel*.

E apre Mr Speaker, ler zot pa ti kontan lafason ki Radyo Sesel ti pe transmet, ti pe *operate* Mr Speaker, zot ti menm met bonm kot Radyo Sesel.

E pandan lannen 1976 nou ti ganny nou lendepandans e nou ti vin en repiblik. E sa ti en keksoz Mr Speaker, ki ti ganny pouse par Mr Rene li menm akoz i ti annan en sel azanda.

Apre lendepandans Mr Speaker, sa menm lannen Mr Mancham ti ganny elekte Prezidan Sesel e Mr Rene ti vin Premye Minis.

Sa letan Mr Speaker, ti annan en koalisyon, kot sa 2 parti ti'n deside pou zot travay ansanm. Laswaf pouvwar Mr

Speaker, ti fer ki apenn 1an Mr Speaker zot ti fer en koudeta.

En koudeta Mr Speaker ki ti anmenn bokou versman disan. E ki ti anmenn bokou douler lo plizyer fanmir. E nou ti antre dan en sistenm Parti Inik.

Kot sa ki pa ti kontan sa sistenm ti ganny forse pou kit pei e al egzile. I annan ti ganny trennen lo erport avek en *bin liner* ek son lenz ladan ti ganny forse lo avyon pou ale, san menm ganny sans dir orevwar zot fanmir.

Bann ki ti deside reste Sesel Mr Speaker, parey ou ek lezot, ti bezwen reste trankil sanfrwa zot ti pou ganny anmase met dan kaso, ganny bate, ganny torture e menm ganny touye. Kot bann Tonton Makout Mr Speaker, ti parwaz nou lavil e teoriz nou pep. Sa letan Mr Speaker, lavi Sesel ti fermal. Nou ti en pep Mr Speaker, ti ki ganny oprese. Kot biznes ti ganny fer antre bann ki byen konekte. Kot bann pti lanpir ti ganny kree, kot zot ti kontrol tou keksoz. E Lepep Seselwa ti bezwen reste trankil.

E la Mr Speaker nou vwar, ki nou vwar? *Leader* Parti Minoriter dan Lasanble Nasyonal ek tou son bann Manm pe aplodi tou sa bann malfe. Tou sa bann malfe ki'n

arrive par glorifye parti *SPUP* ek son *Leader* defen Mr France Albert Rene, ki loter tou sa soufrans ki nou pep in pas ladan.

E la Mr Speaker, se zot ki le montre nou, ki le montre Mr Ramkalawan mannyer pou diriz pei. Kan Mr Speaker, pandan 43an zot in seye dirize me naryen pa'n arrive. Me parey i annan serten Manm ki pa dan Lasanble ozordi ti dir ki zot ti mazin zis zot lekor. Sa en parol ki Mr Rene li menm ti dir lo son lili lopital.

Mr Speaker, zot le montre nou ki mannyer pou diriz pei, kan zot menm zot in kit nou avek en kales kase. Sa parol ki Prezidan Larepublik Mr Ramkalawan ti dir dan enn son ladres. Kot nou Gouvernman ozordi Mr Speaker, pe rod tou sord kalite solisyon, pou rezourd tou sa bann problem ki zot in kit deryer. E ozordi zot pe dir nou, nou enkonpetan!

Ozordi Mr Speaker, nou pti pei Sesel i parey en lekor ki ranpli ek mark, partou lo sa bann mark i annan en pti bout *plaster* Mr Speaker ki ganny kole lo la. E sa parol ki Prezidan ti koz en mwan en fwa dan en konversasyon ansanm.

Prezidan ti dir mwan, "Onorab sak fwa ou tir en pti bout sa *plaster*, ou vwar en

boubou". Pa zis en pti boubou Mr Speaker, en boubou ki'n ovif. E nou Gouvernman i bezwen rod tou fason Mr Speaker pou geri tou sa bann boubou ki anmenn lemorazi dan Sesel ki sa Gouvernman lepase in kit deryer.

Mr Speaker, se sa Sesel ki Prezidan Ramkalawan ek son bann Minis e nou koman bann Manm dan Gouvernman lo kote Gouvernman nou'n erite. E labi lalkol sa i pli gro boubou Mr Speaker ki ozordi nou annan dan nou pei. E ler nou koman en Gouvernman nou pe sey travay pou *deal* avek sa problem.

Labi drog Mr Speaker, ki nou vwar? *US* dan zot *blitz* *Leader* Parti Minoriter Mr Speaker, la mon koz lo mon distrik. I vin *blitz* dan mon distrik avek son lekip e i dir avek bann adikt Gouvernman pa pe get zot. Zot pa merit ganny zis *methadone*. Zot merit osi ganny en larzan Mr Speaker.

Ler nou Mr Speaker, nou pe dir ek sa bann dimoun pran ou tretman, pran en tretman e reabilit ou lekor e vin travay pou Sesel Mr Speaker, zot, zot dir ek sa bann dimoun i *ok*, zot bezwen osi ganny peye Mr Speaker pou asize lo *ghetto* e abiz sibstans!

E ler Mr Speaker ou vwar sa group pe sante, Mozaik ki pe dir Seselwa leve. En zenn group Mr Speaker, dan mon distrik i annan en garson i form par dan sa group. E zot, zot pe dir avek sa bann dimoun i *ok* zot en viktim. Zot ava ganny *methadone* apre nou a pey zot, Mr Speaker.

E zot menm dir tir li 2025, tir li akoz i pa pe donn zot li. Nou, nou pou donner Mr Speaker. E mon pa konnen lekel ki ti pas laba me Onorab Cosgrow in dir klerman se li ki ti pas Stevenson-Delhomme, Mr Speaker.

Se sa kalite lopoziyon ki nou pe *deal* avek Mr Speaker. San realize Mr Speaker ki dan mon distrik Bel Air, i annan bann manman ki pe soufer akoz zot zanfan in mor akoz labi sibstans sa drog ki apel eroin.

Mon demande ler in pas Stevenson-Delhomme si in pase kot sa madanm pli o, i dir mwan non en lot dimoun ki'n pase. E sa lot dimoun ki'n pase Mr Speaker, mon anv demann li eski in pas kot sa madanm ki'n perdi 2 son garson an relasyon avek labi sibstans ki apel eroin, Mr Speaker.

Mwan mon konn sa madanm, mon ti pe ed li dan en travay en fwa. E ler i koz ek mwan Mr Speaker mon war sa

soufrans ki i pe pas ladan. In perdi enn detywa lannen pase e boner lannen pase in perdi en lot Mr Speaker. Ou kapab mazine ki soufrans i annan lo sa bann manman.

E ler nou, nou pe dir ek sa bann adikt i *ok* Mr Speaker ki soufrans nou pe anmenn lo lezot fanmir. E la i fer mon mazin en lot fanmir dan mon distrik Mr Speaker, akoz mon distrik pa'n eparnye avek sa. Menm si i annan ki *call* mon ki dir, *ah* be dan ou distrik i annan drog, pe fer nou fristre Mr Speaker.

Wi mon pou dir Mr Speaker. Mr Speaker mon'n vwar koz enn mon zanmi son manman i mon zanmi, Mr Speaker ki'n tonbe mor lo en sofa an relasyon ek bann malad relye avek labi sibstans Mr Speaker. E ler mon'n koz ek son manman Mr Speaker, ou vwar sa soufrans.

Pli ba i annan en lot manman Mr Speaker, ki koz ek mwan. En fwa mon pas kot li i dir mwan son leker i fermal i anmenn son zanfan lopital, ni en lavenn pou tir en gout disan pou kapab anvoy laboratwar pou teste, dokter pa'n kapab tire.

E i osi dir mwan Mr Speaker ki leker son garson ki ti annan apenn 30an, ti parey

leker en vye madanm 80an Mr Speaker. Eski nou leker pa fermal ler nou vwar, ler nou tann sa bann keksoz koumsa ?

E sa madanm Mr Speaker ki ti koze lo *BBC*, en madanm osi ki dan mon distrik. Mrs Edna Mr Speaker. Mon konn li. Dernyen fwa i ti pe *run* en pti *takeaway* anler kot Zidisyer. Mon ti kontan al aste son manze Kreol ki ti kwi. Me toultan i ti annan sa zoli sourir Mr Speaker. Me anndan i ti pe soufer Mr Speaker, akoz li osi in perdi enn son garson ki li i krwar se eroin ki'n anmenn son garson dan sa direksyon.

E ozordi Mr Speaker piblikman dan sa program, nou'n vwar ki mannyer i pe seye ed son lot garson Mr Speaker, pou kapab sorti dan sa move fleo.

Aprè Mr Speaker aprè zot *blitz* ki nou tande; zot *cc Member*, en garson mon ti vwar li pas pase la, ti travay kot Lasanble avek *Leader* Lopozisyon. Mr Speaker, li i poste lo *Facebook*. I dir "lazes koman dimoun aze dan Bel Air pe soufer!"

Wi Mr Speaker, ozordi sa menm zenn ki pe abiz sibstans se zot ki pe fer nou bann dimoun aze dan nou distrik soufer.

Ler zot sorti lo *ghetto* zot monte, zot mont lakaz Mr Speaker zot pran tou keksoz, manz tou keksoz, vole. Vol tou keksoz pou al vann parey Onorab Labrosse ti fer resorti, menm rob desanm zot ti pran zot ti al vann. Zot al vann. E Mrs Edna ti dir klerman, ki parfw dra lo lili ti napa pou li mete lo son lili akoz son garson ki dan eroin ti pe ronny zot fanmir.

Mr Speaker, sa i fermal. Se sa soufrans - mon anvi dir ek *cc Member US*, Mr Speaker - se sa soufrans ki nou bann dimoun aze pe pas ladan.

Mr Speaker, me pourtan nou annan serten *success stories* lo bann dimoun ki'n servi drog. Dan mon distrik Mr Speaker, mon annan 2 garson Mr Speaker ki'n deside pou antre lo tretman *methadone*. E la zot pe dir mwan ki zot doz pe desann e zot anvi sorti Mr Speaker.

Mon annan en zanmi ki mon ti pe ed li Mr Speaker. Ozordi li in sorti. Atraver *cold turkey* Mr Speaker. En garson entelizan Mr Speaker. Aprè ki in sorti Mr Speaker, ozordi i pe tenir en bon plas travay akoz in byen lekol. In etidye 4an e i trouve ki i pa'n etidye pou naryen 4an on lavi, alors in deside sorti.



E ozordi i pe ed nou Mr Speaker. I pe ed nou lo kote spor, kot i pe ed nou bann zenn dan nou distrik.

Ozordi nou Gouvernman, vi ki mon'n termin avek zenn - nou Gouvernman pe met en ta zefor pou ki lazenes i *enjoy sport*, i partisip dan *sport*. Tou bann lenfrastriktir sportif Mr Speaker ki ti'n les tonm an rin anba Gouvernman *US* pe ganny refer. E i pe ganny refer byen.

*Palais des Sports* Mr Speaker in fini, dapre konpran in fini ganny *handover*. Ki pandan plis ki 5an ti annan en trou kot delo ti koule. E pandan lapli nou pa kapab fer nou *sport*. E la byento bann *sport* parey *handball*, *volleyball* pou kapab antre en perform zot *sports* dan en landrwa prop, normal, Mr Speaker.

Stad Linite Mr Speaker. Stad Linite ozordi nou pa kapab *host en match* enternasyonal Mr Speaker. Akoz son laplenn in degrade e sa osi nou'n ganny dir sa lannen pou al ganny fer Mr Speaker. I pou ganny fer byen. Laplenn koman *track* Mr Speaker. Nou pa pou fer en *track* ki zis tal later rouz apre met son *tartan* lo la Mr Speaker. Nou pou aranz li byen, nou pou met konkret oubyen koltar pou ki sa *tartan* pa sorti, sa sentetik

lo la Mr Speaker. E i pou ganny fer byen Mr Speaker.

I pa pou ganny fer parey *Victoria Gymnasium* Mr Speaker. Zis mazine *Victoria Gymnasium* i ganny fer i ganny *renovate*. En ler mon demande oli bann zofisye dan Gouvernman *or* kot *NSC* sa letan ki ti *supervise* sa louvraz Mr Speaker?

Ozordi *Victoria Gymnasium* plans ki sipoze, ki zwer i sipoze zwe lo la lo *court*, spektater ki pe asiz lo la Mr Speaker. Se sa bann keksoz Mr Speaker ki'n arive dan nou pei. Oli bann ki ti pe *supervise* sa louvraz? Ki zot in fer?

E nou Mr Speaker, nou pou toultan rod solisyon. Nou konnen la pour lemoman nou ava fer lezot. Me en zour petet nou ava met sa plans. Akoz sa bann zot in koupe in fini ganny deranze e nou pa pou kapab servi. E mon pe propoz ek Gouvernman ki a lavenir donn nou, nou plans pou nou kapab zwe lo la Mr Speaker.

Mr Speaker, i annan pe koz bon labous. Se zot ki annan bann plan, pli bon plan. Zot bon lo fer plan, Mr Speaker. Me pou konstri, pou rod finansman zot pa bon lo la Mr Speaker. E nou Mr Speaker koman en Gouvernman, nou fer sir sa bann bon plan ki zot, zot

kontan, ki zot, zot annan. Nou, nou fer. Nou materyaliz li e nou met li an pratik.

E pa bliye Mr Speaker, sa bon ki zot annan lo plan Mr Speaker, zot menm fer plan ki pli gran ki later ki sa batiman pou vin lo la. Zis mazin lekòl La Rosière. Plan i pli gran. Plan i pli gran ki later Mr Speaker.

Ler mon pe koz enfrastriktir, mon rekonnèt Mr Speaker ki bokou proze kapital in ganny konplete. Malgre pandan COVID nou ti ganny dir kennsel tou proze kapital e donn larzan Seselwa.

Akoz Mr Speaker? Akoz zot sa bann dimoun ti pe dir sa Mr Speaker, zot ti'n fini ganny zot larzan *forgo* ki zot ti agree pou pa pran. Pa vre Onorab Cosgrow laba an sekre kot ou pe gete? Apre ki R1.4bilyon Mr Speaker ti'n ganny partaze avek dalon atraver *FA4JR* Mr Speaker. Se koumsa ki sa Gouvernman oparavan ti *operate*.

E ozordi i annan ki pe ganny demande pou rann sa larzan, akoz zot pa ti merite ganny sa larzan. E i annan pe rann nou larzan. Sanmenm sa bann dimoun Mr Speaker ki le montre nou mannyer pou diriz pei. *Shame on you*, Mr Speaker. *Comme* dir sa film ki ti pe sirkile lo medya sosyal, lo *WhatsApp*,

*Shame on you!* Zot in vwar sa film Mr Speaker? En film ki pa tro zoli pou gete. Mwan mon'n *delete* lo mon telefonn, Mr Speaker.

Mr Speaker e en keksoz ki fermal pou mwan Mr Speaker, ler nou bann dirizan dan *LDS* pe travay. Ler nou bann Minis pe al aletranze, pe travay dir. Ou menm Mr Speaker *SADC-PF*, ou pe travay dir pou fer sir ki Sesel i mont lo sa platform. Parey Prezidan Larepublik, Mr Speaker i pe travay dir.

Zot *Leader* zot, li i pe get madanm i eksite! I eksite li Mr Speaker, ler nou, nou pe travay. Sanmenm sa kalite dirizan Mr Speaker ki zot le vin diriz pei. E pa bliye Mr Speaker nou, nou'n fer sir ler nou'n mont *State House* nou'n tir tou matla. Nou'n tir tou matla nou'n zete akoz *State House* pa en landrwa pou vin dormi! *State House* i en landrwa ki nou vin travay. E Prezidan pe fer egzaktaman sanmenm.

Ozordi Mr Speaker, laliberte lekspresyon i relye dan nou pei. Tou dimoun i kapab koze. Bann ki pa ti kapab koze ozordi i koze. Mr Speaker, i annan osi i koze pa dir naryen. Sa osi i annan! Sa menm laliberte lekspresyon Mr Speaker ki *Leader* parti minoriter ler ti dan 5enm

Lasanble ti vote lo sa Lalwa. Akoz? Sa Lalwa ti annan bann restriksyon lo sa menm laliberte ki ozordi li in gannyen ek son parti.

*Public Order Act* Mr Speaker, zot ti vote pou restrikte serten keksoz ler nou, nou ti antre avek 15 lo 10 Mr Speaker. E menm ti annan *case* ki ti ariv Ankour. *Case* Konstitisyonnèl konsernan sa. Ler nou, nou ti antre ek 15 lo 10, nou ti sanze Mr Speaker, nou ti sanze ki drwa lekspresyon i renye dan nou pei.

E avek sa drwa lekspresyon ki renye dan nou pei Mr Speaker, i annan bokou mansonz ki ganny koze. E ozordi Onorab Loze i maltret nou Mr Speaker, atraver sa laliberte lekspresyon ki nou nou'n lager pou zot gannyen. Ki Onorab Ramkalawan in lager pandan tou sa lannen Mr Speaker. I maltret nou, i dir nou kapon, Mr Speaker. Kan i annan en *pervert Maison Du Peuple* ki menm si en lera i pase i eksit avek!

(laughter)

**(APPLAUSE)**

### **HON NORBERT LOIZEAU**

Alor i mal pou Prezidan dir servi li byen sa laliberte lekspresyon?

Ozordi zot pe fer sa pep Mr Speaker, nouri zis lo mansonz zis pou zot ganny latansyon. Latansyon ki zot oule Mr Speaker.

Mon'n pas dan manifeste LDS Mr Speaker. Mon pa'n war kote ki'n ekrir ki nou, ki LDS son manifeste in dir nou pou donn tou dimoun aze en pansyon R10mil.

Onorab Herminie ki'n komans ek sa Mr Speaker. Mon pe gete la dan mon manifeste Mr Speaker. Mon pa konnen mannyer in lir sa li. Mon pa konnen si i pa'n konpran ouswa in lir sa latet anba.

E si ou lir li latet anba ou pa pou konpran ki i dir. Mon krwar sa defet ki Onorab Labonte in donn li, i fer li lir nou manifeste latet anba!

**(APPLAUSE)**

### **HON NORBERT LOIZEAU**

Mr Speaker, apre ozordi ler zour travay zot sove zot al travay. La zot esper nou fini pran nou goute, zot pe pran zot goute laba dan kantin apre ki nou'n fini Mr Speaker.

E Mr Speaker, be mwan mon'n ouver nou manifeste la – “*Our mission for Seychelles.*” *What we will do?* Mon pa vwar. *Get Seychelles past COVID-19* i annan. Nou'n fer Mr Speaker.

Nou'n donn vaksen. Ozordi nou'n ganny nou *herd immunity*. Be nou pe viv an pe. Be pa nou'n fer?

*Make it your Government.* Be pa nou pe dir Sesel i pour tou son zanfan? Dan Sekter Prive travay, dan Sekter Piblik travay. Pa trenn lipye. Me se sa ki nou pe fer Mr Speaker, i annan dan manifesto. Menm bann pe trenn lipye e ler Prezidan i dir pou *deal* ek zot, be zot, zot gele Mr Speaker.

Nou, nou pa fer parey zot, Mr Speaker. Zot lontan si ou vole la zot transfer ou en lot bor. Si ou trenn lipye aköz ou en aktivis *SPPF* zot kit ou la, zot kontan Mr Speaker. E ou ganny ou trezyenm mwan pou lapenn ou pa konpetan. Ou pa'n travay. Se sa zot Mr Speaker.

Be dan manifesto mon pa vwar sa zafer R10mil pou soz. Loportinite pou biznes, be pa bann biznes pe ouver? La *LinkUp* in ouver biznes, *taxi* drayver in antre. Zot it pe manipil bann *taxi* drayver pou fer konplo. Ozordi *taxi* drayver i annan i byen kontan e zot pe *sign up* avek sa soz. Mr Speaker mon pa vwar.

Mr Speaker, ou vwar, zot nouru Lepep Seselwa avek mansonz, ek malpropte zis pou zot ganny latansyon.

*Leader* Minoriter, Onorab Pillay li, ekout ki i rakont nou Mr Speaker, mansonz. I kontan fer sa li. I dir ki i tande. Mr Speaker, ou'n tande, be sa ki ou'n tande i bezwen vre? Ou'n tande. E ekoute ki i dir. *PMC* pe fer vini en gro kanmyon ki ponp malpropte.

*Bro!* Mr Speaker!

*(laughter)*

### **HON NORBERT LOIZEAU**

Be eski en *Leader* dan Lasanble Nasyonal, tou sa bann keksoz enportan dan pei ki annan pou koz lo la, nou koz lo en kanmyon ki ponp malpropte?

***(APPLAUSE)***

### **HON NORBERT LOIZEAU**

Mr Speaker, Mr Speaker be kot nou Lasanble pe ale avek sa bann kalite *Leaders*? Mon per Mr Speaker. Si 2000 Zanmen zot ariv o pouvwar, Mr Speaker be nou pou vwar zis salte.

E Mr Herminie in dir, sa ki nou'n kit anta kit anta. I ti dir dan son Kongre. "Tou sa ki nou vwar anta kit anta!"

Mr Speaker be nou, nou pa en Gouvernman ki kontan malpropte. Si ou vini ou kit en *jeep* ki annan kaka koson, malpropte koson ladan Mr Speaker, ou pa pou kapab mars

ladan, nou pou netwaye Mr Speaker. Sa ki anta nou pou netwaye.

E Mr Speaker, latansyon ki zot pe rode, akoz dimoun in fini ek zot. Dimoun pa pe donn zot latansyon. Be nou koman en Gouvernman Mr Speaker - e pa zwe bliy mon Prezidan i parey mon menm mon Prezidan li. Latansyon ou pa pou ganny zanmen Mr Speaker. Si ou pe tro rode bann kalite latansyon.

E la i annan en *saying* Mr Speaker ki dir - mon ti vwar sa lo *status* en fiy Port Glaud, enn mon zanmi en fiy Port Glaud, ki dir, lo latansyon sa Mr Speaker, ‘Si ou annan en bourik, zanmen donn li tro bokou latansyon. Akoz i pou krwar i en zoli seval.’

*(laughter)*

### **HON NORBERT LOIZEAU**

I pou krwar i en zoli seval Mr Speaker. Kan son letan in eparpiye, son lalang pe trenn ater, son zong in ouver Mr Speaker.

### **MR SPEAKER**

30 minit Onorab.

### **HON NORBERT LOIZEAU**

Pardon?

### **MR SPEAKER**

30 minit. Konklir silvouple.

### **HON NORBERT LOIZEAU**

La Mr Speaker. *Ok.*

Mr Speaker, ozordi Prezidan in dir ki i fristre. Akoz i annan dan Servis Piblik ki pa pe delivre. E permet mwan Mr Speaker vi ki zot pa la, nou pe koz nou dan nou *Caucus*, donn mwan ankor en pti pe letan mon ava fini mon de pti paz Mr Speaker. Akoz zot pa la. Nou ava travay antre nou.

E zot pe kre fristrasyon parmi nou pep. E in donn zot ase letan. E la aksyon pou bezwen ganny pran avek zot.

Mr Speaker i mal sa? Ler en sekter pa pe performen, nou *deal* avek. Mwan mon dir lontan ti'n ler. Sesel pour tou son zanfani ti nou slogan dan eleksyon. Me si i annan move zanfani ki pa pe ekoute. Swa ou aranz ou, swa ou *out* Mr Speaker! E mwan mon pou siport mon Gouvernman Mr Speaker. Mon pou siport mon Prezidan dan tou sa ki in dir.

Akoz in koz Kreol pou zot tou tande. Apre zot ti dir ki Seselwa pe soufer. Ozordi Mr Speaker, tou bann ki *US* ki dir i pe soufer, se bann ki zot ti soutire dan lepace.

Ti mal annan zot Sanmdi pase Mr Speaker. Bann sekreter sekter Mr Speaker. Zot ti apel zot partou ti annan. Zis

zot ti vey zakasyon, vey tou nouvel dimoun partou lo bann *housing estate* pou akonte.

E zot Mr Speaker ki zot ti fer zot? Zot ti viv lo *welfare*. *Welfare* ki zot travay. Zis vey zakasyon, donn lenformasyon lo dimoun e ser dimoun. Sanmenm sa bann ki fer - sa bann ki ti laba la - sanmenm sa ki fer zwer eksite sa Mr Speaker, zot ti laba.

### **MR SPEAKER**

Onorab mon bezwen demann ou terminen silvouple.

### **HON NORBERT LOIZEAU**

Wi, donn mwan ankor zis detrwa pti minit mon ava fini sa Mr Speaker.

*(laughter)*

### **HON NORBERT LOIZEAU**

... pe tard mon letan. Mr Speaker, *US* in telman napa naryen pou koz lo la, alors zot deside koz lo mank dra lopital. Pourtan larepons ti o bor zot Mr Speaker. Ti annan en madanm la o bor zot dapre konpran tou dra li ki ti ansarz, Mr Speaker.

Ti fer biznes dan lopital. Keksoz ti fer vini pa zis pou lopital, pou zot klik. 250 dra, 50 pou zot, 50 pou lopital Mr Speaker.

Lekel ki ti donn nou *laundry* prive? Se zot Mr Speaker. E sa ki enteresan *laundry* prive pou *operate* dan lopital Mr Speaker. E larepons ti o bor zot Mr Speaker. Zot pa ti vwar? Mr Speaker mon pou al en pe vit la.

Mr Speaker, malgre serten defi nou'n akonplir bokou koman en Gouvernman. Dan zis 2an edmi permet mwan fini sa Mr Speaker.

*Passenger terminal* lo Praslin, menm si i annan ti anvi non enn bato enn zot siporter met lo soz, in konplete. E sa ki enteresan Mr Speaker, en zennonm in anvi fer li volonterman pou anbelir sa landrwa. *That's the spirit* Mr Speaker.

Batiman *NIHSS* ki'n terminen, ki'n anmenn nou bann zenn *NIHSS* pli pre avek lopital. Mon pe al vit menm Mr Speaker.

Lopital La Digue pe al konplete, pe al soz. Kordgard La Digue, Baie Lazare, Glacis. Proze lakaz Cascade. *Cold storage* pou *STC*.

Tre byento *National Library* son renovasyon pou fini. I annan lezot ankor ki mon pa'n nonmen. Zis mazin Mr Speaker, zis 2an edmi nou'n fer tousala. Si nou, nou ti dan sa Gouvernman dan 43an Mr

Speaker, la ki Sesel ti pou pet an fler!

Yes!  
(Off-Mic)

**(APPLAUSE)**

**HON NORBERT LOIZEAU**

Pou terminen Mr Speaker, pou terminen Mr Speaker, dan mon distrik Bel Air i annan serten proze ki pe fer. I pa bann gro, gro proze kapital. Me i bann proze ki, pti keksoz ki pe tous leker nou bann zabitan.

Parey bann pti semen segonder ki deservi bokou fanmir. Bann pti *retaining wall*, rigol, *resurfacing* nou bann semen.

E la Bel Eau Mr Speaker, ou pas lo sa semen Bel Eau konmsi ou pe glise lo diber Mr Speaker.

**MR SPEAKER**

Mersi, mersi.

**HON NORBERT LOIZEAU**

Laglas, *crash barriers*, lalimyer e byento posibleman pandan mwan Me pou annan konpilsyon 7 *unit* lakaz, Mr Speaker. Pa bokou, mon ganny 7 mon dir Mersi Minis Rangasamy. 7 lakaz omwen mon'n ganny 7 kot mon bann zabitan i a ...

E pou terminen mon anvi dir avek Lepep Seselwa Mr Speaker, nou lo bon semen. Tou keksoz i get pozitiv. Alor annou reste pozitiv. Pa ekout mansonz me plito rod laklerte dan bann keksoz ki pa kler pou zot e zot a konn laverite. Akoz laverite ki pou liber zot.

Mon anvi remersi mon DA Christopher. *Office assistant* Heera ek lezot. Mon *clerk* Fabiola, mon nouvo *clerk* ki pe ed mon dan sa travay.

E tou zabitan Bel Air ek mon bann aktivis ki a kote mwan e ki pe akonpany mwan lo mon semen dan mon travay.

Mr Speaker, mersi mon ti annan ankor bokou pwen pou dir me selman mon ava kit li pou en lot zour. Mr Speaker, mersi.

**(APPLAUSE)**

**MR SPEAKER**

Mersi pou anmas leres pou en lot zour Onorab. Mon ava apel Onorab Sandy Arissol.

**HON SANDY ARISSOL**

Mersi Mr Speaker. Bonzour Mr Speaker. Bonzour tou Manm Onorab. Bonzour tou manm sekretarya e tou dimoun ki a lekout.

Mr Speaker, mon ti a kontan profite kekfwa avan

komanse pou felisit ou *as* Speaker Lasanble avek bann manm sekretarya pou sa zoli konfigirasyon Lasanble Nasyonal. E mon konpran poudir sa i en diskisyon ki nou ti annan. Mon ti a kontan felisit ou. E nou landrwa i byen zoli.

E mon ti a kontan en mo spesyal pou tou bann travayer Lasanble Nasyonal ki'n met zefor par deryer sa nouvo konfigirasyon pour ki nou travay i kontinyen. Alor pou sa felisitasyon.

**(APPLAUSE)**

**HON SANDY ARISSOL**

Mon ti a kontan osi komanse par dir mon pa konnen, sa bourik ki Onorab Loizeau ti pe koz lo la, ki letan zot in donn li bokou latansyon in krwar i en zoli seval kot i ti ete, si dan Lari Bazar si kot Lorloz oubyen si i ti dan ICCS.

Mr Speaker, ser Manm Lasanble Nasyonal, tou zabitan distrik Bel Ombre e tou Seselwa ki reste e viv aletranze e toultan pe swiv nou lo nivo distrik e lo nivo nasyonal.

Mr Speaker, Sandy John Arissol ki zot tou zot konn li, ti vin en Manm Lasanble Nasyonal an Me 2007, apre i ti ganny aproz par Onorab Ramkalawan sa letan ki ti

*Leader* Lopoziyon pou ranplas li St Louis. Akoz li *Leader* Lopoziyon sa letan ti pe mazin ganny en lot distrik avek bi pou ganny plis siporter e pou ganny plis Manm dan Lasanble Nasyonal e pou mont lo en lot nivo kot in arive ozordi *State House*.

Sa letan Parti *SPPF* ti fann tou sort kalonmni lo mwan e sey demann dimoun pou pa vot pou Sandy Arissol. Zot in sey *bully* mwan, me i pa'n marse. Mwan koman en zenn garson sa letan, mon ti kontan pou form parti en lekip dimoun ki fou. Mon repete, mon ti kontan pou form parti en lekip dimoun ki fou. Akoz se sa ki zot ti apel nou. Bann group dimoun ki fou, ki ti pe rod ganny eleksyon dan nou pei Sesel.

Parkour pa'n fasil ditou Mr Speaker. Dimoun etranze, fanmir e zanmi ti kestyonn mon desizyon. Ki ou pe rode Arissol? Akoz ou pa reste trankil Arissol? Kontinyen fer sa ki ou pe fer Arissol. Eski ou krwar i byen Arissol kot ou pe ale? Reksidere.

Me mon ti persiste akoz en travay ki pa tou dimoun ki kontan fer, selman tou dimoun i kontan sa benefis ki vin avek. Letan mon ti pas kot serten endividi pou rod led pou kre bann group pou ed distrik.



Repons ki mon ti gannyen se ale ou debourye. Mon pa tro kapab vin devan mwan. Mon pe esper en pti *loan*, mon zanfan pe esper son labours. Mon fanmir i travay dan Gouvernman ou konpran ou? Mon siport zot mon selman. Selman, selman, selman ti toultan en leskiz ki nou ti gannyen avek nou frer ser Seselwa. Sa ti leta nou pei sa letan.

Mon ti ava kontan konmanse par dir mersi Mr Speaker. Parske mersi souvandfwa i vin lo dernyen moman e parfwa nou bliye. Mon ti a kontan dir mersi tou dimoun ki apresye travay ki mon fer ek bann deliberasyon ki mon prezante koman en Manm Lasanble Nasyonal. Mersi pou ou kontribisyon ki ou anvoye swa atraver *email*, *text* swa *phone call* swa *WhatsApp*. Mersi bokou.

Mersi pou Lotorite Distrik ki kontinyen fer travay pou asire ki nou zanfan, nou zabitan, ki zot demann i ganny akonpli. Mersi pou tou Lazans ki travay avek lotorite distrik Bel Ombre pou anmenn servis pli pre avek kominote. Mon dir zot mersi.

Mon dir mersi pou legliz. Bann NGOs, lasosyasyon, bann groupman ki nou annan dan distrik ki fer letan pou anmenn

bann fri pozitiv pou nou kominote. Espesyalman pou nou zanfan. Mersi mon dir e nou apresye tou sa ki zot fer pou ou distrik ek nou zabitan.

Mersi tou zabitan Bel Ombre ki en travayer, ki leve granmaten e al debourye pou sonny son fanmir, pey zot det e kontribye pou nou pti pei. Napa en papa ki kontan letan son zanfan pa pe debourye kot lekol. Napa en biznessmenn ki pa kontan letan enn son travayer pe kale dan son biznes.

Alor ti normal pou Prezidan Larepublik, Papa nou Nasyon, adres *civil servant* Mr Speaker. I pa'n maltret person, me sa ki in dir se Seselwa pou bezwen leve, debourye e bann ki dan travay zot pou bezwen kontribye pou sa pei e aret trenn zot lipye.

Sa i normal Mr Speaker. Mon pe dir i normal parske mon bezwen fer Seselwa rapel ti annan en kanpany anmennen par Gouvernman *SPPF* - en kanpany ki ti apel "Leve Debourye."

Le 13 Novanm 2009 ti annan en konferans ki ti ganny fer dan *STC Conference Room* pou lans sa kanpany "Leve Debourye." Laba sa ki ti la, ti annan Mc Suzy Mondon sa letan, Prezidan James Michel, ti annan Vincent Meriton, Patrick

Herminie ti la e Bernard Shamlaye e lezot zofisyè Gouvernman.

Mr Speaker, ou konnen ki ti ganny dir dan sa konferans, dan sa kanpany par Mc Suzy Mondon ki ti pe koze?

*“That campaign is another decisive step in the national effort to help our working population become more resourceful, more industrious, and more productive”.*

Mrs Mondon i kontinyen eksplike.

*“That under the program from welfare to work, people who are able to work will be removed from welfare, and placed into employment or be involved in some form of productive activity while waiting to be fully employed”.*

Lezot lenformasyon ki nou ti gannyen sa letan avek Marina Confait.

*“The campaign has been introduced as the Government feel not everybody is taking on their responsibilities. This campaign is to inculcate the “Leve Debourye” culture in our youth and in every Seychellois. So, as to help increase their responsibility and productivity”.*

Napa naryen nouvo Mr Speaker e Prezidan pa'n ensilte person. Leve Debourye lontan

in la, me Gouvernman SPPF in kale lo la.

Alor mon ti a kontan dir mersi bann frer ek ser ki'n vin devan e donn en koudmen dan nou distrik. Zot lide, zot letan pou asire ki distrik ek pei i fonksyonnen. Mersi pou tou ki kontinyen krwar dan sa travay ki nou fer, konman en lekip.

Mersi pou ou ki *call* mwan pou en vizit kot ou, pou partaz nide e fer bann propozisyon pozitiv. Mon reste angaze pou servi mon distrik ek mon pei. Kontinyen *call* mwan, *email* mon, anvoy mon mesaz, *WhatsApp* mwan e nou kapab zwenn.

Parey mon'n fer pandan sa 2an, se mwan ki vin kot ou pa ou ki vin kot mwan. En mersi i al osi pou ou ki pa krwar, ki pa anvi krwar oubyen ki pa enterese ki nou distrik oubyen nou pei i progresse. Mersi pou ou ki refize partisipe. Mersi pou bann komanter negativ ki ou fer lo rezo sosyal. Tousala i konte Mr Speaker e pour sa mon dir mersi.

An tou leka mon apresye aköz apre tou ti annan 3 rezilta eleksyon dan distrik Bel Ombre. Enn kot zabitan ti vot pou son lekor aköz i ti gat son vot, en lot zot ti vot pou mon oponan ki ti *US* e trwazyenm rezilta ti bann dimoun ki ti

siport mwan ek mon parti pou nou kontiny sa travay ki nou pe fer. Mersi bokou pou zot tou.

Mon bezwen osi dir mersi Mr Speaker pou sa kalite Lopozisyon ki nou annan ozordi. En Lopozisyon konfize, deregle, e tiraye. Ki konn zis zot lekor, *boycott* tou progre e proze ki Gouvernman i fer. Zot antisipe pou mont *State House*. Ou konnen akoz Mr Speaker akoz la lafous pe mir, larzan pe rantre dan kof, alor zot mazin *State House* ki mannyer pou defris li ankor!

Sakenn pe rod pozisyon. La nou'n ganny dir zot *Leader* en zenn pti *duke* ki annan en leker 14an. Be zot pe anbet lekel? Zot sekreter en lot zenn parey zot trezorye. Be kestyon ki nou pe demande oli bann boutey rouz ki ti pe debout lo miray dan Konferans Lapres? Mon poz sa la.

Dimoun in dekrir zot koman en kales kase, koman en loto ki rate ki tanzantan radyater i sek. En pe pyes in sorti Lasin, en pe in sorti *Cuba*, en pe in sorti *La Tanzanie*. Zot *road tax* in *expire*, lasirans pa egziste dan zot vokabiler. Zot nimerò loto nepli 1122. Me in vin 69. Sis sa enn mon ava al sers sa lot, *comme* dir Douglas Cedras.

Alors zot drayver i eksite letan i war madanm. Mon dir mersi pou sa kalite lopozisyon, akoz si zot reste koumsa engra, napa plan e divize zot pa pou zanmen war *State House* ankor dan zot lavi.

**(APPLAUSE)**

**HON SANDY ARISSOL**

Byento zot pou pran bann *bin liners* parey Onorab Herminie in *remind* zot e al kasyet zot aletranze e zot ava vin zis zour vakans.

Sa menm *MNA* Mr Speaker ki zabitan English River pa'n *sign up* pou li apre ki zot in dekok son lasenn ek sa gro marto gro may, in taye English River, in vini i dir ek nou napa dra, napa lili. Si napa lili savedir napa pasyan, si napa pasyan savedir napa malad!

Dan tou son leta dezespware, i dir ek nou dimoun in ganny brile e dimoun in brile dan dife lo *landfill*. I vwar tou sityasyon dan nou pei koman en *paranoia*. Sel *paranoia* se letan zot pe zwe *musical chair*, Ernesta out Herminie in!

Gouvernman *LDS* i kapab fer pli gro proze parey sa gro *Library* Nasyonal ki zot in kit li pouri ;- sa gro Lopital La Digue ki nou pe konstrir. Sa gro lekol

lasante ki ti'n tonm an rin. Me pour zot, zot pa vwar nanryen. Tou keksoz pou zot i reste en kaka-nyonyont parey zot menm. E la zot in en parti kaka-nyonyont minoriter

Swadizan zot pe met presyon lo *LDS*. Sa ti ganny dir par Onorab Herminie. *Too little too late* Onorab Herminie. Ek nou, pa ek nou. Onorab Herminie i vini i dir ek nou, ek nou pa ek nou. Sa ki Onorab Herminie pa dir nou i fek ganny en kontra ek sanmenm sa Gouvernman *LDS* ki swadizan ek nou pa ek nou.

Zot madanm, zot imsyé, zot zanfan kot i travay zot? *Dans le village, dans les nuages?* Pa ek sanmenm sa Gouvernman *LDS* ki swadizan annan ek nou pa ek nou?

E mon bezwen dir mersi mon Gouvernman, dirize par nou Prezidan John Charles Ramkalawan ki pe kontinyen netway salte 43an. Nou konnen ki pa tou dimoun ki kontan ou, premyerman aköz ou nwanr koman en zonm, zot pa kontan zot. Aköz ou fran, zot pa kontan. Alor nou, nou pou e deplis ou onnet, zot pa kontan.

Be nou, nou felisit ou pou sa travay ki ou pe fer. Me *still* ou'n ouver *State House*. Ozordi laport *State House* i ouver pou tou Lepep Seselwa pti koman

gran, vye koman zenn. *State House* i nepli vin en zafer zis pou en pti group dimoun.

Alor felisitasyon Prezidan Ramkalawan pou sa bon travay ki ou pe fer. E nou konsyan ki lekspektasyon dimoun la deor i grander lesyel. I annan dimoun ki ankoler aköz son lekspektasyon pa ancor ganny akonpli. Me nou konsyan ki travay i la, me osi asire ki pei i fer byen ekonomikman pou ki larisés i ganny partaze egalman parey ou'n fer pandan sa dernyen 2an.

Kot bann travayer in ganny logmantasyon. La nou tande 10poursan logmantasyon ancor, rediksyon R300 lo *bill* litilite, trezyenm mwan saler baze lo en performans. *Welfare* in ogmante, lasistans pou bann ki ti envalid ki'n vin pou lavi olye repas lo *Board* pou gete si ou kote lipye i repouse dan 3mwan, oubyen ou lebra osi i repouse dan 2mwan. Tousala in ganny asiste Mr Speaker.

*Part rental* revize pou asire ki sa paran i ganny asiste. Logmantasyon dan *allowance* nou bann zanfan ki pe etidye aletranze. *Breakfast*, goute ek dezennen pou tou nou zanfan dan lekol. Be pei pe glise menm sa?

Gouvernman pe fer revizyon dan saler ek *allowance*

dan Gouvernman pou asire ki travayer i ganny plis larzan dan son pos. Revizyon dan bann lasistans sosyal parey bann zanfan *semi orphans* ki'n la pou plizyer lannen, me zanmen sa in ganny revize.

Ou'n rod larzan nou Prezidan, pou fini tou proze ki ti'n kaye dan nou pei parey konblaz Praslin, Zil Eve ki'n ganny konble 25an. Gran mersi nou Gouvernman ki'n dekonble li ozordi. Apre ou ganny en Manm ki vini, i vin sant laglwar Mr Speaker.

Asire ki tou benefis i kontinyen ganny peye, saler ek *allowances* enkli pou lopoziyon ki kontinyen refize asiste Lasanble Nasyonal, zot taye pou fer zot travay selman zot ki koz lo non lepep.

Sekirite nou bann dimoun aze, ki mon konnen ou pe mazin en bon revizyon la lo mon Prezidan. Akoz plizyer nou bann dimoun aze ozordi se zot ki pe okip enn swa enn oubyen de zanfan ki paran in mor dan drog oubyen ki'n pri dan drog. E sa pti sekirite sosyal ozordi pa ase pou zot *enjoy* zot vye zour. E zot ti ganny dir par *United Seychelles - A New United Seychelles* - ki *LDS* pou aras zot sa sekirite sosyal, me zot ankor pe gannyen mon bann vye dimoun aze e zot pou toultan

gannyen. Eski pei pe glise menm sa?

Letan mon lo size dimoun aze, i enportan pou fer resorti ki desizyon pou laz retreat mont 65an ti en desizyon *Cabinet* Mr Faure, ki Onorab Wallace Cosgrow ki'n koz lo la yer li osi i ti lo sa *Cabinet* sa letan li. Li osi i ti pran sa desizyon. Li osi i ti aprouv sa desizyon.

La i vini i fer en *u-turn* e i koz ek sa dernyen 950 dimoun ki swadizan *SBC* in anbet nou zot ti dan *Maison du Peuple*. Kan nou tou nou konnen ki *ICCS*, *Maison du Peuple* i pran environ 600 dimoun. E zot, zot in gonfle, zot in vin sa bourik parey Onorab Loizeau in dir ki'n ganny sitan lankourazman, flate e zot in santi zot koman sa zoli seval.

Kestyon ki mon demande, *allowance* ledan i ti gannyen li Onorab Cosgrow letan i ti Minis li. La ozordi i ankoler akoz in aret gannyen. I pa anvi al lo ban klinik parey i dir ek nou akoz laba napa dra.

Be larzan *forgo* dan *Cabinet* ler i ti pe koz lo la ek sa dernyen siporter *US*, pa i ti dir pou solider avek zot akoz zot pe soufer? Be koman i ti tonm deor ki i ti fer Mr Speaker? I ti pran sa gro *allowance forgo*. Lepep pa bliye sa.

Prezan sa ki lepep i bezwen demann li. Sa larzan *forgo la*, ti *allowance* ledan, ti *allowance* loto, ti *allowance* sekirite? Dir sa dernyen siporter Onorab. Napa okenn leson pou zot donn personn Parti *US*.

Size drog, mon anvi dir mersi lo lapar bann dimoun dan distrik Bel Ombre pou sa lalit kont drog. Tro bokou nou zenn dan distrik in mor, swa pe mor avek drog. Larm ek sagren lo figir nou bann papa ek nou bann manman dan mon distrik.

Zanfan pe ganny servi dan sa lalit pou li kasyet drog, pou anmenn drog e pou li servi drog. Zanfan pa kapab ganny servi koman baravan pou bann droger, toultan pou annan *casualty* si i annan zanfan parmi droger. Letan i annan batay kont drog sirtou.

Alor mon pe demann bann paran pou zot pran zot responsabilite. Aret soutir bann fenean, bann droger devan zot laport e servi zanfan pou mars avek zot drog letan lakaz pe ganny fouye.

Mr Speaker, letan nou Gouvernman anba gidans nou Prezidan pe sey fer tou pou bouz nou pei lo en nivo pli o ki nou'n vin zwenn. E i ti fer li anba *motto* 'Sesel Pour Tou Son Zanfan'.

Me A *New United Seychelles* zot *motto* se "Personn Pa Pou Bar Zot". E zot gran *Leader* ti dir, sa ki seye bar zot pou vwar li dan en rigol anba en pon. Sa i fer zot anvi retourn *State House* pou zot remet Seselwa dan en rigol anba en pon.

Letan Mr Faure, sa zonm ki zot pa oule ditou ozordi ti dir "Sesel i pli gran ki nou", zot gran *Leader* ki anvi al *State House* i dir, i eksite letan i vwar madanm. Sa leksitasyon ki fer zot anvi mont *State House*. Prezan zot a vin donn nou leson. Napa okenn leson pou Parti *US* donn personn dan sa pei.

*US* napa okenn leson pou donn personn Mr Speaker. Zot ti dir pa ouver erport, pa pran vaksen. Zot ti dir vaksen pa lo standar, Seselwa pou vin bann *alien*. Blok bann proze dan distrik e lo nivo nasyonal. Get Lekol Lasante ozordi, get nivo *National Library*, enkli lagrandisman lo Stad Linite ek Stad Popiler. Lopital La Digue, proze semen dan tou distrik. Prezan ki annan proze lakaz ki pe al ganny fer. Zot ti kriye la zot dir nou pe koup riban.

Wi Mr Speaker, nou pou koupe riban aköz nou ki'n ouver erport pour ki larzan i antre dan bann biznes, pour ki

biznes i devlope, pour ki Seselwa i ganny en saler. Pour ki biznes i pey son *tax*. Sa i fer ki Gouvernman i ganny larzan e i kre larises pou nou fini tou bann proze ki ti'n kaye anba Gouvernman *US*.

Wi nou pou koup riban e i annan ankor riban pou nou koupe. Kontan pa kontan zot. Kestyon ti larzan. Kestyon ki dimoun pe demande eski tou sa bann proze i ganny fer avek larzan *US* sa? Pei ti pou *US*? La finalman riban osi i pou *US* menm? Tousala Mr Speaker se larzan Lepep Seselwa. Alor nou pou koup ankor riban.

Louvertir por Praslin ki sa non sakre se pa politisyen ki ti donner, me en konpetisyon parey Doyace ti dir ek nou, Onorab Doyace ti dir ek nou ki ti ganny fer lo nivo nasyonal. E en zenn fiy Mahe ki ti ganny sa konpetisyon pa en politisyen Mr Speaker me en zenn Seselwa. Alor mon anvi dir ek li Felisitasyon pou sa partisipasyon.

**(APPLAUSE)**

**HON SANDY ARISSOL**

Me par kont ladministrasyon *United Seychelles* apre ki sa konblaz ti'n la pou plis ki 21an, ti zis fer Komite parti Komite, *meeting* parti *meeting*, konsep

parti konsep, se gran mersi nou Gouvernman ki'n delivre e rod solisyon pou demann zabitan Praslin apre ki sa zil in ganny neglize pou plizyer lannen.

Si Onorab Gill ek Mitcy Larue ti anvi vin lo plak, zot ti devret pran par dan konpetisyon e met zot non devan.

**(APPLAUSE)**

**HON SANDY ARISSOL**

Si sa proze ti en gran *legacy* Mr Rene, kestyon ki mon bezwen demande, be aköz son bann zanfan byenneme parey Mr James Michel, Mr Danny Faure zot pa ti kontiny *legacy* zot papa? Me en lot zanfan ki'n vin fini *legacy* Mr Rene. Be ou pa vwar zot annan en problemn?

**(APPLAUSE)**

**HON SANDY ARISSOL**

Mr Speaker si erport ti reste fermen kote nou ti pou ganny larzan pou pey travayer? Eski nou ti pou fer parey larzan *forgo*, pa pran, pran deryer laport. Mon repete napa okenn leson pou *US* vin donn personn dan sa pei.

Mr Speaker, annou get en kou lekel ki tret son kanmarad toupri dan nou Lasanble. Ou pa ti la. Onorab Loze in tret nou

Prezidan koman en toupi, se ler nou gete pli gro toupi dan Lasanble Nasyonal se li menm li.

Manm ki'n vin koz lo *bullying*, li ki'n ganny lodas vin koz lo *bullying* kan li menm li dan Lasanble en pli gran *bully*. I sey *bully* Speaker par dir Speaker i *bais*! I sey maltret Manm ki i pa kontan. Kriy avek Mins dan Lasanble Nasyonal. Manm ki'n sey kre plis dezord dan nou Lasanble e nou devret donn li en meday pou plis *walk out*, la i vin koz *bullying*.

Mon repete zot napa leson pou donn personn dan nou pei e menm dan Lasanble Nasyonal. Parey in dir i bezwen pweni e prostern devan zot pou li ganny en tyak. Gro toupi napa leson pou donn personn. Ou'n en *failure* pou ou parti avek ou lekor!

Ozordi anba gidans nou Prezidan bann zenn pe ganny rekonnet e apresye, non pa zis bann ki ti dan milisya e ganny rekonpanse akoz zot Sef ti eksite ler ti vwar zot lo tron koko Grand Police, bor lanmer.

Logmantasyon dan *stipend*, enkli *allowances* pou manmay dan pos-segonder. Eski zenn in ganny oublie la? Ozordi nou syantis Seselwa ki ganny sans pou li koze e donn *interview* kot *SFA*. Lakour nou

vwar zenn Mazistra e bann zenn Ziz. Zenn Seselwa pe reprezant Sesel lo nivo enternasyonal dan bann konpetisyon parey nou'n vwar kot *NISTI* atraver bann konpetisyon *robot*.

Labank Santral zenn Seselwa, *FIU* zenn Seselwa. Lasanble Nasyonal, zenn Seselwa. Zenn Seselwa pe fer byen dan ledikasyon. Seselwa pe fer tre byen dan bann liniversite.

Sa semenn nou'n tande *Nouvobanq* e nou'n vwar dan *NASYON* in fer en *course* lo *AML*, se bann zenn Seselwa ki'n fer tre byen enkli en zabitan Bel Ombre. Tou sa dan nou pti pei ki swadizan pe glise.

E fodre pa nou bliye Mr Speaker, letan tou sa bann zenn pe fer byen personn pa pe rode lekel son papa, lekel son manman, ki son parti politik i frekante. Me tou posibilite i la e li i bezwen zis debourye parey Prezidan Ramkalawan i dir.

Prezidan in pran kont bann paran ki zot zanfan in ne e pe viv ek en dezabilite. Avek bann nouvo *wheelchair* a zot konfor e pou soulaz sa paran. Mersi Prezidan. E ou'n fer sa dan en moman kot ou ti kapab pe pas letan avek ou prop zanfan, me ou'n fer li avek lezot zanfan, lezot dimoun zour ou



lanniverser le 15 Mars.  
Felisitasyon nou Prezidan.

**(APPLAUSE)**

**HON SANDY ARISSOL**

E zot kontinyen dir nou pei pe glise, pei pe glise. Zot napa okenn leson pou donn personn Parti US.

Letan nou Gouvernman anba gidans nou Prezidan pe travay, zot *motto* se tir li pou zot ariv *State House* akoz zot *eksite* letan zot vwar madanm. Zis zot kriye pei pe glise, pei pe glise, pei i glise menm. Be foutou, glise ou glise ou tonbe, ou glise, ou glise, ou glise ou pa tonbe?

Selman zot saler ek zot pansyon zanmen i glise, zanmen i an retar sa zot pa vwar Mr Speaker. Ler zot pe sey fer krwar pei pe glise ki zot solisyon? Zot napa solisyon zot Mr Speaker. Zis fer dimoun fristre, senm mansonz, fer krwar goute pe al arete. Fer krwar nou pe lager antre nou. Koz zis *allowance* ledan ki zot menm ki ti envante. La zot ledan i pli fermal ki fermal.

Letan zot napa solisyon zot sey anmenn *Tinky Winky* sou anvil, anbet droger pou revolte, organiz Konferans Lapres personn pa vini. La mon krwar zot nepli fer la. Sey fer sa detrwa aktivis vin zannimo e

danse pou zot. Sant sanson lo zannimo zot dir. Sa ou a *tell me comme* dir madanm Bel Ombre. Solisyon pou ariv *State House*.

Zot napa en plan Mr Speaker, zot *boycott* tou keksoz e zot pa prezant naryen avek Lepep Seselwa. Sey fer lamars selman Sef i asiz dan *pickup*.

Sey fer en *rally*, Manman tou *rally fail, fail e plis failure* pou *A New United Seychelles!* Zot napa okenn leson pou donn personn dan sa pei. Zot gran largiman se pei pe glise, Seselwa i mizer e Seselwa i lafen. Be annou get en kou lekel sa pti group Seselwa swa ki lafen e lekel sa pti group ki mizer.

En pti group dimoun ki zot ti deklar zot lekor envalid, zot pa kapab travay. En bann ti zwe ganny bebelouka alor pou li pa travay. Alor tou le mwan zot ti ganny en gro lanvlop sorti kot *Welfare* sinyen e otorize par bann Minis sa lepok. Zis asiz kot li koman sekreter sekter parey Onorab Loizeau in dir, vey zaksyon tou son vwazen, ki ou frekante, ki sanson ou zwe, kote ou ale. Alor ozordi sa *bingo* in arete dan distrik. Zwer in arete zwe sa bingo. Alor zot lafen e zot mizer. Solisyon ki nou annan pou zot, leve e al travay.

Lekel sa pti group dimoun ki lafen e mizer? Bann ki ti ganny lavyann *SMB* sa lepok pou naryen akòz ti ganny partaze dan sed, kot *pickup* ti *standby* e drayver apre ti al anmenn kot Sef. Serten rezen *STC* ganny *hijack* depi lo *highway*, partaze antre zot dalon e aktivis. Pannyan ranpli pou Desanm. La sa privez in arete, alor zot lafen e zot mizer. Solisyon? Leve al travay!

Lekel sa pti group ki lafen e mizer dan nou pei? En pti group, sa zot menm ki dan *rally*. Zot menm ki dan *rally*, zot menm ki *ICCS*, zot menm ki pe dans sanson lo zannimo. Lekel zot? Letan ki zot ti ganny lakaz, Sef ti gard en lakle ek zot e i ti antre ler i anvi dan zot flat.

*(laughter)*

### **HON SANDY ARISSOL**

Zot *bill* ti ganny peye, gas ti ganny aste, drayver ti anmenn diven pou *Valentine* e bouke fler pou son laniverser. Travay zot pa ti oule. *Comme* dir Onorab Pillay, zot ti pe tete ek park menm. Solisyon zot bezwen leve al travay. Zot pa lafen e zot pa mizer! La tou sa privez in fini, labi in koupe, larzan in aret donner alor zot lafen e zot mizer. Solisyon mon repete se leve al travay!

Sa zafer get marmay, fer keksoz in fini. Sanmenm leksitasyon ki sa gran *Leader* in dir ler i vwar madanm. Prezan gran *Leader* i lafen, aktivis i mizer e nanryen pa kapab ganny fer. Sa fristrasyon ki parmi bann *US*, Mr Speaker. Napa okenn leson pou zot donn person! Si zot lafen, zot mizer, zot bezwen fer parey tou Seselwa leve al travay bann *US*!

Lekel sa group dimoun ki fristre? Menm dimoun ki ti pe ganny tou Kontra kot Biro brans. Parey zot ti apel li sa letan, ti vin zot lakaz, zot ti servi tou, zot ti pran tou, zot ti donn tou. Tors, bouret, bogi, masin koup zerb, masin koup pye dibwa. E nou ti ganny dir dan sanmenm sa Lasanble. La ozordi sanmenm sa pti group dimoun ki fristre, zot lafen, zot fristre e zot lafen, zot napa naryen.

Alor Mr Speaker, nou bezwen dir ek zot leve e al travay parey tou Seselwa pe fer. Letan botan in fini! Pa bliye bal dan simityer, bal kot *SBFA*. Partaz nou larzan antre fanmir. Sa ki'n sove, sa ki'n al kasyet. Sa ki ti sanz konman *ninja* pou nou pa remark li. *Shame on you* bann *US*, *comme* dir ton Gill! La zot ganny kouraz e lodas pou zot dir ek nou zot mizer, zot

lafen. *Shame* on zot! Leve al travay parey tou Seselwa pe fer.

Bal lo later konble *Ile Soleil*, partaz later konblaz antre zot, *FA4JR* donn zot dalon, menm si i pa ti bezwen akoz ti annan gro sonm lo zot kont. Kart *STC* ti pe ganny vann antre dalon. E lo zot kont 60mil an montan. En bann ti vin *carer* otomatikman san rann en servis personn, me ganny en saler tou le mwan. Kan i pe monte desann *Dubai* pou al aste fos seve ek fos zong pou vin revann, selman i *carer* li.

Ler tousala in ganny aboli, sa pti group zot fristre, zot lafen pei pe glise, lekonomi pa pe fer byen. Zot bezwen leve al travay parey tou Seselwa! La aprezan zot nepli kapab pran dra lopital, servyet e vann latizann Lepep Seselwa. Zot ti profit lo pasyan ki ti al trete pou desann ek zot rido, paye, lenz maryaz pou zot kouzin ek tantin. Menm laport loto bann pasyan ti desann avek pou zot !

**(APPLAUSE)**

### **HON SANDY ARISSOL**

Prezan sa madanm bonnbek i a vin dir ek nou napa dra lopital. Get otour ou, get laba deryer, get dan bife, tir dra lopital e rann lopital! E ozordi zot dir mwan dezenfektan, detol,

tousala i pran pou li netwaye. Zot napa okenn leson pou donn personn dan sa pei.

Mr Speaker mon anvi dir mersi Prezidan Ramkalawan pou koup file tou dimoun ozordi dan sa pei. Tou Seselwa i konn konze ozordi, Tou dimoun i lib pou eksprim son lekor. Zournalis i kapab demann nenport ki kestyon ki i anvi e tir tou sa ki lo son leker anba nou ladministrasyon.

Anba ladministrasyon avan ti napa sa liberte. Kestyon ti ganny ekrire avan, ganny dir davans. Zournalis pa ti ganny kouraz pou fer lamars. Ozordi mon felisit zot pou sa kouraz pou zot desann. Desann ankor eksprim zot lekor, sa i leta nou Nasyon anba ladministrasyon *LDS*.

### **MR SPEAKER**

30minit Onorab. Ou pe al konklir?

### **HON SANDY ARISSOL**

Non pa ti ankor 30minit Mr Speaker, mon'n get byen mon ler ava mon komanse.

### **MR SPEAKER**

Non, non ou'n arive 30minit.

### **HON SANDY ARISSOL**

Mon ava konklir.

**MR SPEAKER**

Konklir silvouple. Mersi.

**HON SANDY ARISSOL**

Ozordi personn pa pe fer letour ou lakaz anba nouvo ladministrasyon, oubyen anmar ou ek en blok masin e al zet ou dan diranto. Pa pou met en plastik nwanr otour ou likou! Alor mon pe demann tou Seselwa pou zot kontinyen koze, eksprim zot lekor, devid sa ki annan lo zot lestoman, sa i sanzman ki nou'n anmennen pou zot.

Sa Leta nou Nasyon Mr Speaker. Fristrasyon partou dan lemonn i annan. Sesel pa en leksepsyon. Fristrasyon Bel Ombre nou osi nou annan. Nou annan en konblaz ki'n la pou plizyer lannen. Later in sanz lanmen e la nou'n met en lord lo la. Dimoun Bel Ombre i anvi konnen ki plan nou annan pou sa konblaz.

Friustrasyon kot langar peser. Nou'n ganny dir ki ti annan en gro donasyon ki ti ganny donner pou nou annan en zoli proze kot langar. Larzan in perdi i annan mil an pase e i annan fristrasyon an relasyon avek sa.

Friustrasyon *ex-Corsaire*, plan in ganny soumet in sanze, kote in arive, ki pe arive. Eski biznesmenn Bel Ombre in vin

devan oubyen nou pou bezwen en lot investiser? Sa i bann fristrasyon ki i annan.

Friustrasyon se sa bout later kot Anse Sima, kot i annan en proze ki en etranze in aste. Nou ti a kontan konnen ki pe arive avek? Eski i annan en plan ki'n ganny soumet kot *Planning*? Parske i annan en vye *building* la e i zis la pe dormi pou plizyer lannen.

Friustrasyon semen Carpin ki planifikasyon diskisyon e konpansasyon in arive apre plis ki 21an? Dimoun i anvi konnen. Friustrasyon Marie Laure, eski proze pre pou fini pou ki sa bout lans i vin en landrwa prop, aksesib e ekitab pou zabitan Bel Ombre kapab servi?

Ler mon pe konklir alor tou sa fristrasyon Mr Speaker pa en lenvansyon *LDS* sa, toultan i la. Alor nou pou bezwen travay ansanm pou gete ki mannyer nou kapab amelyor lavi nou kominote e asir li.

*US* in ganny defet e i pou ganny defet dan lot eleksyon e nou pou met zot dan bin listwar enn fwa pou tou. E nou pou met tou son fristrasyon dan en goni e al zet li mil dan fon lanmer laba kot sa drog ki i pe rode i ete.

Alor pou nou fristrasyon fini Bel Ombre, mon pe envit

tou dimoun pou sa gran *meeting* piblik ki Prezidan in envit nou. Bel Ombre nou ti fer enn lannen pase, sa lannen nou pe fer en lot pou zot kapab adres zot fristrasyon.

Alor avek sa detrwa mo, mon ti a kontan dir mersi tou dimoun Bel Ombre. Dir mersi tou mon bann Manm isi pou zot sipor e Sekretarya pou sa travay kontinyen pou sa lannen 2023. Mersi bokou.

**(APPLAUSE)**

**MR SPEAKER**

Mersi Onorab. Bon nou'n ariv a lafen repons lo ladres Leta Lanasyon. Nou pou *adjourn*.

Mon zis pas en pti moman lo *Order Paper* semenn prosenn pou lenformasyon nou piblik. Nou pou komans bann sesyon regilye avek kestyon e se Minis pou Later ek Labita ki pou vin devan Lasanble pou reponn kestyon Manm. E apre sa nou osi annan serten *Bills* e premye Lalwa ki devan nou se *Communications Bill, 2022*.

Mon swet bann Manm en bon wikenn e nou a rebran Lasanble Mardi le 21 Mars 9er bomaten. *Adjourn*.

**(ADJOURNMENT)**